

金史卷四

元中書右丞相總裁托克托等修

本紀第四

熙宗

熙宗宏基纘武莊靖孝成皇帝諱亶本諱哈喇

原作合刺

太祖孫景宣

皇帝子母富察氏天輔三年己亥歲生天會八年安班貝勒杲旣

薨太宗意久未決十年左副元帥宗翰右副元帥宗輔左監軍完

顏希尹入朝與宗幹議曰安班貝勒虛位已久今若不早定恐授

非其人哈喇先帝嫡孫當立相與請於太宗者再三迺從之四月

庚午詔曰爾爲太祖之嫡孫故命爾爲安班貝勒爾其無自謂沖

幼狎于童戲惟敬厥德安班貝勒者昔太宗嘗居是官及登大位

以命弟杲杲薨帝定議爲儲嗣故以是命焉十三年正月己巳太

宗崩庚午卽皇帝位甲戌詔中外詔公私禁酒癸酉遣使告哀于齊高麗夏及報卽位仍詔齊自今稱臣勿稱子二月乙巳追諡太祖后唐古氏曰聖穆皇后費摩氏曰光懿皇后追冊太祖妃布薩原作僕散氏曰德妃烏庫哩氏曰賢妃辛酉改葬太祖于和陵三月己卯齊高麗遣使來弔祭庚辰諡大行皇帝曰文烈廟號太宗乙酉葬太宗于和陵甲午以古倫右貝勒都元帥宗翰爲太保領三省事封晉國王戊戌詔諸國使賜宴不舉樂四月戊午齊高麗遣使賀卽位丙寅昏德公趙佶薨遣使致祭及賻贈是月甘露降于熊岳縣五月甲申左副元帥宗輔薨九月壬申追尊皇考豐王爲景宣皇帝廟號徽宗皇妣富察氏爲惠昭皇后戊寅尊太祖后赫舍哩氏太宗后唐古氏皆爲太皇太后詔中外乙酉改葬徽宗及惠昭后于興陵十一月以尙書令宋國王宗磐爲太師乙亥初頒歷

己卯以元帥左監軍完顏希尹爲尙書左丞相兼侍中太子少保
高慶裔爲左丞平陽尹蕭慶爲右丞己丑建天開殿于約羅十二
月癸亥始定齊高麗夏朝賀賜宴朝辭儀以京西鹿圍賜農民十
四年正月己巳朔上朝太皇太后于兩宮齊高麗夏遣使來賀癸
酉頒厯于高麗丁丑太皇太后赫舍哩氏崩乙酉萬壽節齊高麗
夏遣使來賀上本七月七日生以同皇考忌日改用正月十七日
二月癸卯上尊諡曰欽獻皇后葬睿陵三月壬午以太保宗翰太
師宗磐太傅宗幹並領三省事丁酉高麗遣使來弔八月丙辰追
尊九代祖以下曰皇帝皇后定始祖景祖世祖太祖太宗廟皆不
祧癸亥詔齊國與本朝軍民訴訟相關者文移署年止用天會十
月甲寅以吳激爲高麗王生日使蕭仲恭爲齊劉豫回謝并生日
正旦使十五年正月癸亥朔上朝太皇太后于明德宮齊高麗夏

遣使來賀初用大明歷己卯萬壽節齊高麗夏遣使來賀六月庚
戌尙書左丞高慶裔轉運使劉思有罪伏誅七月辛巳太保領三
省事晉國王宗翰薨丙戌夜京師地震封皇叔宗雋宗固叔祖暈
皆爲王丁亥汰兵興濫爵十月乙卯以元帥左監軍達蘭爲左副
元帥封魯國王宗弼右副元帥封瀋王知樞密院事兼侍中時立
愛致仕十一月丙午廢齊國降封劉豫爲蜀王詔中外置行臺尙
書省于汴十二月戊辰劉豫上表謝封爵癸未詔改明年爲天眷
元年大赦命韓昉耶律紹文等編修國史以勗爲尙書左丞同中
書門下平章事徙蜀王劉豫臨潢府

天眷元年正月戊子朔上朝明德宮高麗夏遣使來賀頒女直小
字封大司空昱爲王甲辰萬壽節高麗夏遣使來賀二月壬戌上
如約羅春水乙丑幸天開殿己巳詔罷拉林水混同江護邏地與

民耕牧三月庚寅以禁苑隙地分給百姓戊申以韓昉爲翰林學

士四月丁卯命少府監盧彥倫營建宮室止從儉素壬午朝享于

天元殿立費摩氏爲貴妃五月己亥詔以經義詞賦兩科取士六

月戊午至自天開殿秋七月辛卯左副元帥達蘭東京留守宗雋

來朝丁酉按春原作按出許河水溢壞廬舍民多溺死壬寅左丞相希

尹罷八月甲寅朔頒行官制癸亥回鶻遣使朝貢己卯以河南地

與宋以右司侍郎張通古等使江南以京師爲上京府曰會寧舊

上京爲北京九月甲申朔以諛爲會寧牧封鄧王乙未詔百官誥

命女直契丹漢人各用本字渤海同漢人丁酉改燕京樞密院爲

行臺尙書省戊戌上朝明德宮甲辰以奕爲平章政事己酉省燕

中西三京平州東西等路州縣辛亥權行臺左丞相張孝純致仕

十月甲寅朔以御前管勾契丹文字李德固爲參知政事丙寅封

叔宗強爲紀王宗敏邢王太宗子呼拉布

原作解
魯補

等十三人爲王

己巳始禁親王以下佩刀入宮辛未定封國制癸酉以東京留守宗雋爲尙書左丞相兼侍中封陳王十一月丙辰以康宗以上畫像工畢奠獻于乾元殿十二月癸亥新宮成甲戌高麗遣使入貢丁丑立貴妃費摩氏爲皇后

二年正月壬午朔高麗夏遣使來賀戊戌萬壽節高麗夏遣使來賀以左丞相宗雋爲太保領三省事進封充國王興中尹完顏希尹復爲尙書左丞相兼侍中二月乙未上天開殿三月丙辰命百官詳定儀制四月甲戌百官朝參初用朝服己卯宋遣使謝河南地五月戊子太白晝見乙巳上至自天開殿六月己酉朔初御冠服辛亥烏舍謀反伏誅己未上從容謂侍臣曰朕每閱貞觀政要見其君臣議論大可規法翰林學士韓昉對曰皆由太宗溫顏

訪問房杜輩竭忠盡誠其書雖簡足以爲法上曰太宗固一代賢君明皇何如昉曰唐自太宗以來惟明皇憲宗可數明皇所謂有始而無終者初以艱危得位用姚崇宋璟惟正是行故能成開元之治末年怠於萬幾委政李林甫奸諛是用以致天寶之亂苟能慎終如始則貞觀之風不難追矣上稱善又曰周成王何如主昉對曰古之賢君上曰成王雖賢亦周公輔佐之力後世疑周公殺其兄以朕觀之爲社稷大計亦不當非也七月辛巳宋國王宗磐寇國王宗雋謀反伏誅丙戌以右副元帥宗弼爲都元帥進封越國王丁亥以誅宗磐等詔中外己丑以左副元帥達蘭爲行臺左丞相杜充爲行臺右丞相蕭寶耶律暉行臺平章政事甲午咸州詳袞沂王暈坐與宗磐謀反伏誅辛丑以太傅領三省事宗幹爲太師領三省如故進封梁宋國王八月辛亥行臺左丞相達蘭翼

王呼蘭原作鶴懶及呼勒希圖原作活達蘭子幹泰額特布原作幹帶

謀反伏誅丁丑太白晝見九月戊寅朔降封太宗諸子大司空昱

罷丙申初居新宮立太祖原廟于慶元宮壬寅宋遣王倫等乞歸

父喪及母韋氏等拘倫不遣以温都思忠諸路廉問十月癸酉夏

國使來告喪十二月豫國公昱薨

三年正月丁丑朔高麗夏遣使來賀癸巳萬壽節高麗夏遣使來

賀以都元帥宗弼領行臺尙書省事四月乙巳朔温都思忠廉問

諸路得廉吏杜遵晦以下百二十四人各進一階貪吏張軫以下

二十一人皆罷之癸丑蜀國公完顏尼楚赫薨丁卯上如燕京五

月丙子詔元帥府復取河南陝西地己卯詔冊李仁孝爲夏國王

命都元帥宗弼以兵自黎陽趨汴右監軍薩里罕出河中趨陝西

是月河南平六月陝西平上次涼陘大旱使蕭彥讓田穀決西京

囚秋七月癸卯朔日有食之乙卯宗弼遣使奏河南陝西捷丁卯

詔文武官五品以上致仕給俸祿之半職三品者仍給僉人八月

辛巳詔撫諭陝西五路壬午初定公主郡縣主及駙馬官品九月

壬寅朔宗弼來朝戊申上至燕京己酉親饗太祖廟庚申宗弼還

軍中夏國遣使謝賄贈癸亥殺左丞相完顏希尹右丞相蕭慶及

希尹子昭武大將軍巴達原作把搭符寶郎滿達原作漫帶戊辰夏國遣使

謝封冊十一月癸丑以孔子四十九代孫璠襲封衍聖公癸亥以

都點檢蕭仲恭為尚書右丞前西京留守昂為平章政事甲子行

臺尚書右丞相杜充薨十二月乙亥都元帥宗弼上言宋將岳飛

張俊韓世忠率眾渡江詔命擊之丁丑地震己亥以元帥左監軍

阿里布為左副元帥右監軍薩里罕為右副元帥

皇統元年正月辛丑朔高麗夏遣使來賀庚戌羣臣上尊號曰崇

天體道欽明文武聖德皇帝初御袞冕癸丑謝太廟大赦改元丁巳萬壽節高麗夏遣使來賀己未初定命婦封號夏國請置榷場許之己巳封平章政事昂爲漆水郡王二月戊寅詔諸致仕官職俱至三品者俸祿人力各給其半宗弼克廬州乙酉改封海濱王耶律延禧爲豫王昏德公趙佶爲天水郡王重昏侯趙桓爲天水郡公戊午上親祭孔子廟北面再拜退謂侍臣曰朕幼年游佚不知志學歲月逾邁深以爲悔孔子雖無位其道可尊使萬世景仰大凡爲善不可不勉自是頗讀尙書論語及五代遼史諸書或以夜繼焉己未上晏羣臣于瑤池殿適宗弼遣使奏捷侍臣多進詩稱賀帝覽之曰太平之世當尙文物自古致治皆由是也四月丙子以濟南尹韓昉參知政事辛巳宗弼請伐江南從之五月己酉太師領三省事梁宋國王宗幹薨庚戌上親臨日官奏戌亥不宜

哭泣上曰君臣之義骨肉之親豈可避之遂哭之慟命輟朝七日
六月甲戌詔都元帥宗弼與宰執同入奏事庚寅行臺平章政事
耶律暉致仕壬辰有司請舉樂上以宗幹新喪不允甲午紀王宗
強薨上親臨輟朝如宗幹喪七月癸卯以景宣皇帝忌辰命尙食
徹肉丙午以宗弼爲尙書左丞相兼侍中都元帥領行臺如故己
酉宗弼還軍中辛亥參知政事耶律讓罷九月戊申上至自燕京
朝太皇太后于明德宮詔賜鰥寡孤獨不能自存者人絹二疋絮
三斤是秋蝗都元帥宗弼伐宋渡淮以書讓宋宋復書乞罷兵宗
弼以便宜畫淮爲界十一月己酉高麗國賀受尊號稽古殿火十
二月癸巳夏國賀受尊號天水郡公趙桓乞本品俸詔調濟之左
丞勗進先朝實錄三卷上焚香立受之

二年正月乙未朔高麗夏遣使來賀己亥上獵于拉林河乙巳命

伐高麗丁未上至自拉林河辛亥萬壽節高麗夏遣使來賀壬子
衍聖公孔璠薨子拯襲二月丁卯上如天開殿甲戌振熙河路戊
子皇子濟安生辛卯宋使曹勛來許歲幣銀絹二十五萬兩疋畫
淮爲界世世子孫永守誓言改封蜀王劉豫爲曹王壬辰以皇子
生赦中外三月辛丑還自天開殿大雪丙午以宗弼爲太傅丙辰
遣左宣徽使劉箬以袞冕圭冊冊宋康王爲帝歸宋帝母韋氏及
故妻邢氏天水郡王並妻鄭氏喪于江南戊午立子濟安爲皇太
子丙寅以臣宋告中外庚午五雲樓重明等殿成五月癸巳朔不
視朝上自去年荒于酒與近臣飲或繼以夜宰相入諫輒飲以酒
曰知卿等意今旣飲矣明日當戒因復飲乙卯賜宋誓詔辛酉宴
羣臣於五雲樓皆盡醉而罷七月甲午回鶻遣使來貢北京廣寧
府蝗丁酉賜宗弼金券八月丁卯詔歸朱弁張邵洪皓于宋辛未

復太宗子呼嚕

原作胡盧

爲王振陝西九月壬辰詔給天水郡王子姪

塔天水郡公子俸給十一月甲寅平章政事漆水郡王昂薨追封

鄆王十二月乙丑高麗王遣使謝封冊庚午宋遣使謝歸三喪及

母韋氏壬申上獵于和約爾瑪勒

原作核耶朶米

路癸未還宮甲申皇太

子濟安薨

三年正月己丑朔以皇太子喪不御正殿羣臣詣便殿稱賀宋高

麗夏使詣皇極殿遙賀乙巳萬壽節如正旦儀三月辛卯以尙書

左丞勗爲平章政事殿前都點檢宗憲爲尙書左丞丁酉太皇太

后唐古氏崩己酉封子道濟爲魏王五月丁巳朔京兆進瑞麥癸

亥上致祭太皇太后甲申初立太廟社稷六月己酉初置驍毅軍

七月丙寅上致祭太皇太后庚辰太原路進獬豸並瑞麥八月辛

卯詔給天水郡王孫及天水郡公塔俸祿丙申老人星見乙巳諡

太皇太后曰欽仁皇后戊申葬恭陵十二月癸未朔日有食之

四年正月癸丑朔宋高麗夏遣使來賀甲寅詔以去年宋幣賜始

祖以下宗室己未以宋使王倫為平州轉運使既受命復辭罪其

反覆誅之乙丑陝西進嘉禾十有二莖莖皆七穗己巳萬壽節宋

高麗夏遣使來賀乙亥上祭欽仁皇后哭盡哀二月癸未上如東

京丙申次木巴

原作百泊

河春水丁酉回鶻使來賀以鈕祜祿罕努

粘合

報之五月辛亥朔次薰風殿六月辛巳朔日有食之七月庚

午建原廟於東京八月癸未殺魏王道濟九月乙酉上如東京壬

子畋于沙河射虎獲之十月乙卯遣使祭遼主陵辛酉詔薰風殿

二十里內及巡幸所過五里內並復一歲癸酉行臺左丞相張孝

純薨十一月壬辰立借貸饑民酬賞格甲辰以河朔諸郡地震詔

復百姓一年其壓死無人收葬者官為斂藏之陝西蒲解汝蔡等

處因歲饑流民典願為奴婢者官給絹贖為良放還其鄉十一月
己酉上獵于海島十二月甲午至東京

五年正月丁未朔宋高麗夏遣使來賀癸亥萬壽節宋高麗夏遣
使來賀二月乙未次濟州春水三月戊辰次天開殿五月戊午初
用御製小字壬申以平章政事勗諫上為止酒仍布告廷臣六月
乙亥朔日有食之八月戊戌發天開殿九月庚申至自東京十月
辛卯增諡太祖閏月戊寅大名府進牛生麟壬辰懷州進嘉禾十
二月戊申增諡始祖以下十帝及太宗徽宗丁巳赦

六年正月辛未朔宋高麗夏遣使來賀壬申封太祖諸孫為王乙
亥畋于美稜原作謀勒甲申還京師丁亥萬壽節宋高麗夏遣使來賀

庚寅以邊地賜夏國王辰如春水帝從禽導騎悞入大澤中帝馬
陷因步出亦不罪導者乙未封威赫原作假喝為王二月丙寅右丞相

韓企先薨三月壬申以阿里布爲行臺右丞相四月庚子朔上至
自春水以同判太宗正事宗固爲太保右丞相兼中書令戊午行
臺右丞相阿里布薨五月壬申高麗王楷薨辛卯以左宣徽使劉
筈爲行臺右丞相六月乙巳殺宇文虛中及高士談乙丑遣使弔
祭高麗并起復嗣王峴九月戊辰朔以許王破汴睿宗平陝西鄭
王克遼及羅索尼楚赫皆有大功并爲立碑戊寅曹王劉豫薨是
歲遣鈕祜祿罕努招耶律達實被害

七年正月乙丑朔宋高麗夏遣使來賀辛巳萬壽節宋高麗夏遣
使來賀癸未以西京鹿園爲民田丁亥太白經天三月戊寅高麗
遣使謝弔祭起復四月戊午宴便殿上醉酒殺戶部尙書宗禮六
月丁酉殺橫海軍節度使田穀左司郎中奚毅翰林待制邢具瞻
及王植高鳳廷王傲趙益興龔夷鑿等七月己巳太白經天曲赦

畿內九月太保右丞相宗固薨以都元帥宗弼為太師領三省事
都元帥行臺尙書省事如故平章政事勗為左丞相兼侍中都點
檢宗賢為右丞相兼中書令行臺右丞相劉筈左丞蕭仲恭為平
章政事李德固為尙書右丞秘書監蕭肄為參知政事十月壬子
平章行臺尙書省事奚寶薨十一月癸酉以工部侍郎布薩達斡
原作僕散太彎為御史大夫乙亥兵部尙書秉德進三角羊巳卯詔減常
膳羊豕五之二癸未以尙書左丞宗憲為行臺平章政事同判大
宗正事亮為尙書左丞十二月戊午參知政事韓昉罷兵部尙書
秉德為參知政事

八年正月庚申朔宋高麗夏遣使來賀丙子萬壽節宋高麗夏遣

使來賀二月壬子以克哂克巴噶原作哥魯葛波古等為橫賜高麗夏國

使甲寅以大理卿宗安等為高麗王暉封冊使乙卯上如天開殿

四月戊子朔日有食之辛丑遣參知政事秉德等廉察官吏庚戌
至自天開殿甲寅遼史成六月乙卯平章政事蕭仲恭爲行臺左
丞相左丞亮爲平章政事都點檢唐古辯爲尙書左丞高麗王遣
使謝封冊七月乙亥御史大夫布薩達斡罷以侍衛親軍都指揮
使阿嚕岱爲御史大夫戊寅以尙書左丞唐古辯奉職不謹杖之
八月戊戌宗弼進太祖實錄上焚香立受之庚子以尙書左丞相
昂領行臺尙書省事右丞相宗賢爲太保尙書左丞相丙午以行
臺左丞相蕭仲恭爲尙書右丞相閏月庚申宰臣以西林多鹿請
上獵上恐害稼不允丙寅太廟成九月丙申尙書左丞唐古辯罷
以左宣徽使稟爲尙書左丞十月辛酉太師領三省事都元帥越
國王宗弼薨十一月壬辰太白經天乙未左丞相宗賢左丞稟等
言州郡長吏當並用本國人上曰四海之內皆朕臣子若分別待

之豈能致一諺不云乎疑人勿使使人勿疑自今本國及諸色人
量才通用之辛丑以尙書左丞相宗賢爲左副元帥平章政事亮
爲尙書左丞相兼侍中參知政事秉德爲平章政事庚戌左副元
帥宗賢復爲太保左丞相左副元帥如故十二月乙卯以右丞相
蕭仲恭爲太傅領三省事左丞相亮爲尙書右丞相乙亥以左丞
相宗賢爲太師領三省事兼都元帥

九年正月甲申朔宋高麗夏遣使來賀戊戌太師領三省事都元
帥宗賢罷領行臺尙書省事勗爲太師領三省事同判大宗正事
充爲尙書左丞相右丞相亮兼都元帥庚子萬壽節宋高麗夏遣
使來賀壬寅左丞相充薨丙午以右丞相亮爲左丞相判大宗正
事宗本爲尙書右丞相左副元帥宗敏爲都元帥南京留守宗賢
爲左副元帥兼西京留守己酉宗賢復爲太保領三省事二月甲

寅會寧牧唐古辯復為尙書左丞尙書左丞稟為行臺平章政事
 三月癸未朔日有食之辛丑以司空宗本為尙書右丞相兼中書
 令左丞相亮為太保領三省事四月壬申夜大風雷雨雷震壞寢
 殿鴟尾有火入上寢燒幃幔帝趨別殿避之丁丑有龍鬪於利州
 榆林河水上大風壞民居官舍瓦木人畜皆飄颺十數里死傷者
 數百人五月戊子以四月壬申丁丑天變肆赦命翰林學士張鈞
 草詔參知政事蕭肄摘其語以為誹謗上怒殺鈞是日曲赦上京
 囚庚寅出太保領三省事亮領行臺尙書省事戊申武庫署令耶
 律巴克沁原作八斤妄稱上言宿直將軍蕭榮與胙王元為黨誅之六
 月己未以都元帥宗敏為太保領三省事兼左副元帥左丞相宗
 賢兼都元帥八月庚申以劉筈為司空行臺右丞相如故宰臣議
 徙遼陽渤海之民於燕南從之侍從高壽星等當遷訴於后后以

白上上怒議者杖平章政事秉德殺左司郎中薩哈九月丙申以
領行臺尙書省事亮復爲平章政事戊戌以右丞相宗本爲太保
領三省事左副元帥宗敏領行臺尙書省事平章政事秉德爲尙
書左丞相兼中書令司空劉箬爲平章政事庚子以御史大夫宗
甫爲參知政事十月乙丑殺北京留守胙王元及弟安武軍節度
使扎拉左衛將軍塔斯大赦癸酉以翰林學士京爲御史大夫十
一月癸未殺皇后費摩氏召胙王妃薩滿入宮戊子殺故鄧王子
阿蘭達爾癸巳上獵于和羅溫圖瑁遣使殺妃烏庫哩氏及瓜爾
佳氏張氏十二月己酉朔上至自獵所丙辰殺妃費摩氏於寢殿
而平章政事亮因羣臣震恐與黨駙馬唐古辯寢殿實達爾大興
國護衛十人長呼圖額喀楚克等謀爲亂丁巳以呼圖額喀楚克
當內直命省令史李老僧語興國夜二鼓興國竊符矯詔開宮門

召辯等亮懷刀與其妹夫塔斯隨辯入室宮門守者以辯駙馬不
疑內之及殿門衛士覺抽刃劫之莫敢動呼圖額將楚克至帝前
帝求榻上常所置佩刀不知已爲興國易置其處呼圖額將楚克
遂進弑帝亮復前手刃之血濺滿其面與衣帝崩時年三十一左
丞相秉德等遂奉亮坐羅拜呼萬歲立以爲帝降帝爲東昏王葬
于皇后費摩氏墓中貞元三年改葬于大房山蓼香甸諸王同兆
域大定初追諡武靈皇帝廟號閔宗陵曰思陵別立廟十九年升
祔于太廟增諡宏基纘武莊靖孝成皇帝二十七年改廟號熙宗
二十八年以思陵狹小改葬于峨眉谷仍號思陵詔中外
贊曰熙宗之時四方無事敬禮宗室大臣委以國政其繼體守文
之治有足觀者末年酗酒妄殺人懷危懼所謂前有讒而不見後
有賊而不知馴致其禍非一朝一夕故也



金史卷四

金史卷四考證

天眷元年四月立費摩氏爲貴妃 按松漠紀聞作圖克坦氏

三年六月上次涼涇 按舊刻訛涼涇今據海陵本紀及伊喇子

敬傳改正

三年十二月乙亥都元帥宗弼上言宋將岳飛張俊韓世忠率衆

渡江詔命擊之 按續通鑑本末補紹興十一年命張俊楊沂

中帥兵赴淮西岳飛進兵江州無韓世忠率衆渡江之文金史

遺楊沂中而稱韓世忠或傳聞未審之辭

世祖元山前... 聖德... 功績... 永隆之報

中華... 公... 聖德... 功績... 永隆之報

聖德... 功績... 永隆之報

聖德... 功績... 永隆之報

聖德... 功績... 永隆之報

聖德... 功績... 永隆之報

聖德... 功績... 永隆之報

金史卷五

元中書右丞相總裁托克托等修

本紀第五

海陵

廢帝海陵庶人亮字元功本諱都古魯訥原作迪古乃遼王宗幹次子

也母大氏天輔六年壬寅歲生天眷三年年十八以宗室子為奉

國上將軍赴梁王宗弼軍前任使以為行軍萬戶遷驃騎上將軍

皇統四年加龍虎衛上將軍為中京留守遷光祿大夫為人慄急

多猜忌殘忍任數初熙宗以太祖嫡孫嗣位亮意以為宗幹太祖

長子而已亦太祖孫遂懷覬覦在中京專務立威以厭伏小人明

安蕭裕領險敢決亮結納之每與論天下事裕揣知其意因勸海

陵舉大事語在裕傳七年五月召為同判大宗正事加特進十一

月拜尙書右丞務攬持權柄用其腹心爲省臺要職引蕭裕爲兵部侍郎一日因召對語及太祖創業艱難亮因嗚咽流涕熙宗以爲忠八年六月拜平章政事十一月拜右丞相九年正月兼都元帥熙宗使實達爾原作小底大興國賜亮生日悼后亦附賜禮物熙宗不悅杖興國百追其賜物海陵由此不自安三月拜太保領三省事益邀求人譽引用勢望子孫結其驩心四月學士張鈞草詔忤旨死熙宗問誰使爲之左丞相宗賢對曰太保實然熙宗不悅遂出爲領行臺尙書省事過中京與蕭裕定約而去至良鄉召還海陵莫測所以召還之意大恐旣至復爲平章政事由是益危迫熙宗嘗以事杖左丞唐古辯及右丞相秉德辯乃與大理卿烏達原作帶謀廢立而烏達先以此謀告海陵他日海陵與辯語及廢立事曰若舉大事誰可立者辯曰胙王常勝乎問其次曰鄧王子阿蘭

亮曰阿蘭屬疎安得立辯曰公豈有意邪海陵曰果不得已捨我其誰於是旦夕相與密謀護衛將軍塔斯疑之以告悼后曰辯等公餘每竊竊聚語竊疑之后以告熙宗熙宗怒召辯謂曰爾與亮謀何事將如我何杖之亮因此忌常勝阿蘭且惡塔斯因河南兵士孫進自稱皇弟按察大王而熙宗之弟止有常勝扎拉海陵乘此搆常勝扎拉阿蘭達蘭熙宗使塔斯鞫之無狀海陵曰塔斯鞫不以實遂俱殺之護衛十人長布薩呼圖舊受宗幹恩圖克坦額哱楚克海陵姻家大興國給事寢殿時時乘夜從主者取符鑰歸家以爲常興國嘗以李老僧屬海陵得爲尙書省令史故使老僧結興國爲內應而興國亦以被杖怨熙宗遂與亮約十二月丁巳呼圖額哱楚克內直是夜興國取符鑰啟門納海陵秉德辯烏達圖克坦貞李老僧等人至寢殿弑熙宗秉德等未有所屬呼圖曰

始者議立平章今復何疑乃奉海陵坐皆拜稱萬歲詐以熙宗欲
議立后召大臣遂殺曹國王宗敏左丞相宗賢是日以秉德爲左
丞相兼侍中左副元帥辯爲右丞相兼中書令烏達爲平章政事
呼圖爲左副點檢額喙楚克爲右副點檢貞爲左衛將軍興國爲
廣寧尹於是自太師領三省事昂以下二十人進爵增職各有差
己未大赦改皇統九年爲天德元年參知政事蕭肄除名鎮南統
軍博濟原作李樞爲尙書左丞賜左丞相秉德右丞相辯平章政事烏
達廣寧尹興國點檢呼圖額喙楚克左衛將軍貞尙書省令史老
僧辯父刑部尙書阿里等錢絹馬牛羊有差甲子誓太祖廟召秉
德辯烏達呼圖額喙楚克興國六人賜誓券丙寅以燕京路都轉
運使劉麟爲參知政事癸酉太傅領三省事蕭仲恭尙書右丞稟
罷以行臺尙書左丞溫都思忠爲右丞乙亥追諡皇考太師憲古

宏道文昭武烈章孝睿明皇帝廟號德宗名其故居曰興聖宮宋高麗夏賀正旦使中道遣還

二年正月辛巳以同知中京留守事蕭裕爲祕書監癸巳尊嫡母圖克坦氏母大氏皆爲皇太后圖克坦氏宮曰永壽大氏宮曰永寧乙巳以勵官守務農時慎刑罰揚側陋恤窮民節財用審才實七事詔中外遣侍衛親軍步軍都指揮使完顏思恭等以廢立事報論宋高麗夏國以左丞相兼左副元帥秉德領行臺尙書省事二月戊申朔封子元壽爲崇王庚戌降前帝爲東昏王給天水郡公孫女二人月俸甲子以兵部尙書完顏元宜等充賀宋生日使戊辰羣臣上尊號曰法天膺運睿武宣文大明聖孝皇帝詔中外永壽永寧兩太后父祖贈官有差以右丞相唐古辯爲左丞相平章政事烏達爲右丞相三月丙戌宋高麗遣使賀卽位以弟充爲

司徒兼都元帥詔以天水郡王玉帶歸宋四月戊午殺太傅領三省事宗本尙書左丞相唐古辯判太宗正府事宗美遣使殺領行臺尙書省事秉德東京留守宗懿北京留守卞及太宗子孫七十餘人周宋國王宗翰子孫三十餘人諸宗室五十餘人辛酉以尙書省譯史蕭玉爲禮部尙書祕書監蕭裕爲尙書左丞司徒充領三省事封王都元帥如故右丞相烏達爲司空左丞相兼侍中平章政事劉筈爲尙書右丞相兼中書令左丞宗義右丞溫都思忠爲平章政事參知政事劉麟爲尙書右丞殿前左副點檢布薩呼圖爲殿前都點檢五月戊子以平章行臺尙書省事右副元帥大臬爲行臺尙書右丞相元帥如故壬辰以左副元帥薩里罕爲行臺尙書左丞相元帥如故同判太宗正事宗安爲御史大夫六月丙午朔高麗遣使賀卽位甲子太廟初設四神門及四隅梁巖七

月己丑司空左丞相兼侍中烏達罷以平章政事温都思忠爲左丞相尙書左丞蕭裕爲平章政事右丞劉麟爲左丞侍衛親軍步軍都指揮使完顏思恭爲右丞參知政事張浩丁憂起復如故戊戌夏國遣使賀卽位及受尊號八月戊申以司徒充爲太尉領三省事都元帥如故以禮部尙書蕭裕爲參知政事九月甲午立惠妃圖克坦氏爲后十月癸卯太師領三省事勗致仕辛未殺太皇太妃蕭氏及其子任王威赫使使殺行臺左丞相左副元帥薩里罕于汴并殺平章政事宗義前工部尙書穆里延原作謀里野御史大夫宗安皆夷其族以魏王威泰孫呼爾察好修飾亦族之十一月癸未尙書左丞相劉筈罷以會寧牧圖克坦恭爲平章政事尙書左丞劉麟右丞完顏思恭罷以參知政事張浩爲尙書右丞乙酉以行臺尙書左丞張通古爲尙書左丞丙戌白虹貫日丁亥以太

后旨稱令旨戊子以十二事戒約官吏乙丑命庶官許求次室二人百姓亦許置妾十二月癸卯朔詔去羣臣所上尊號丙午初定襲封衍聖公俸格命外官去所屬百里外者不許參謁百里內者往還不得過三日癸丑立太祖射碑于赫舍哩部中上及皇后致奠于碑下甲寅野人來獻異香卻之乙卯有司奏慶雲見上曰朕何德以當此自今瑞應毋得上聞若有災異當以諭朕使自警焉己未罷行臺尚書省改都元帥府爲樞密院詔改定繼絕法以右副元帥大臬爲尚書右丞相兼中書令參知行臺尚書省事張中孚爲參知政事都元帥充爲樞密使太尉領三省事如故元帥左監軍昂爲樞密副使刑部尚書趙資福爲御史大夫

三年正月癸酉朔宋高麗夏遣使來賀乙亥參知政事蕭玉丁憂起復如故癸未立春觀擊土牛丁亥初造燈山于宮中戊子生辰

宋高麗夏遣使來賀甲午初置國子監謂御史大夫趙資福曰汝等多徇私情未聞有所彈劾朕甚不取自今百官有不法者必當舉劾無憚權貴乙未上出獵宰相以下辭於近郊上駐馬戒之曰朕不惜高爵厚祿以任汝等比聞事多留滯豈汝等苟圖自安不以民事自念耶自今朕將察其勤惰以爲賞罰其各勉之丁酉白虹貫日二月丁巳還宮三月庚寅以翰林學士劉長言等爲宋生日使壬辰詔廣燕城建宮室己亥謂侍臣曰昨太子生日皇后獻朕一物大是珍異卿試觀之卽出諸絳囊中乃田家稼穡圖后意太子生深宮之中不知民間稼穡之艱難故以爲獻朕甚賢之四月丙午詔遷都燕京辛酉有司圖上燕城宮室制度營建陰陽五姓所宜海陵曰國家吉凶在德不在地使桀紂居之雖卜善地何益使堯舜居之何用卜爲丙寅罷歲貢鷹隼沂州男子吳真犯法

當死有司以其母老疾無侍爲請命官與養濟著爲令閏月辛未
朔命尙書右丞張浩調選燕京仍諭浩無私徇丙子命大官常膳
惟進魚肉舊貢鵝鴨等悉罷之丁丑罷皇統間苑中所養禽獸歸
德軍節度使阿里布以撤官舍材木構私第賜死戊戌詔朝官稱
疾不治事者尙書省令監察御史與太醫同診視無實者坐之五
月壬子以戒敕宰相以下官語中外戊辰宰臣請益嬪御廣嗣續
上命圖克坦貞詔宰臣前所誅黨人諸婦人中多朕中表親欲納
之宮中平章政事蕭裕不可上不從遂納宗太子蘇爾圖原作莎魯
宗固子呼喇勒原作胡里刺和碩打原作胡失打秉德弟嘉哩等妻宮中六
月丙子殺太府監完顏富魯原作馬六宋遣使祈請山陵不許九月庚
戌賜燕京役夫帛人一匹以東京路兵馬都總管府判官蕭子敏
爲高麗生日使修起居注蕭朋格原作彭哥爲夏國生日使十月己巳

殺蘭子山明安蕭拱以右副點檢富珠哩

原作不
木魯

阿哈

原作
阿海等爲

宋正旦使十一月癸亥詔罷世襲萬戶官前後賜姓人各復本姓

十二月戊辰杖壽寧縣主蘇尼

原作
徐輦

癸酉獵于近郊乙酉還宮是

歲子崇王元壽薨

四年正月丁酉朔宋高麗夏遣使來賀羣臣請立皇太子從之戊

戌初定東宮官屬立捕盜賞格癸卯太白經天壬子生辰宋高麗

夏遣使來賀癸亥朝謁世祖太祖太宗德宗陵甲子還宮二月丁

卯立子光英爲皇太子庚午詔中外甲戌如燕京昭義軍節度使

蕭仲宣家奴告其主怨謗上曰仲宣之姪達年鄂博

原作迪
輦阿不

近以

誹謗誅故敢妄愬命殺告者達年鄂博者蕭拱也戊子次泰州三

月丙申朔以刑部尙書田秀頴等爲宋生日使四月丙寅朔有司

請今歲河南北選人並赴中京銓注從之壬辰上自秦州如涼陘

五月丁酉獵于伊拉齊

原作立

山甲寅賜獵士人一羊乙卯次臨

潢府丁巳太白經天六月甲子朔駐綿山戊寅權超台

原作楚底部明

安納延伏誅七月癸卯命崇義軍節度使烏達之妻唐古定格原作

定殺其夫而納之八月癸亥朔獵于托紐

原作途你

山甲戌以侍御史

博囉

原作保魯

鞫事不實杖之丙子次于達幹

原作鐸瓦

九月甲午次中京

丙午尙書右丞相大臭罷殺太府少監劉景以都水使者完顏滿

丕

原作麻發

爲高麗生日使吏部郎中蕭中立爲夏國生日使十月壬

戌朔使使奉遷太廟神主御史大夫趙資福罷甲申以太子詹事

張用直等爲賀宋正旦使殺太祖長公主烏嚕杖罷其夫平章政

事圖克坦恭封其侍婢呼達

原作忽達

爲國夫人恭兄定格初尙烏嚕

定格死恭強納焉而不相能又與侍婢呼達不協呼達得幸于后

遂譖于上故見殺而并能恭十一月戊戌以咸平尹李德固爲平

章政事辛丑買珠于烏爾古德喀勒

原作烏爾古迪烈部

及扶餘

原作蒲與

路禁

私相貿易仍調兩路民採珠一年戊申以前平章政事圖克坦恭

爲司徒十二月甲子斬妄人敵僊于中京市辛未以汴京路都轉

運使左瀛等爲賀宋正旦使庚寅太尉領三省事樞密使充薨

貞元元年正月辛卯朔上不視朝詔有司受宋高麗夏回紇貢獻

丙午生辰宋高麗夏遣使來賀以中京留守高楨爲御史大夫二

月庚申上自中京如燕京三月辛亥上至燕京初備法駕甲寅選

良家子百三十餘人充後宮乙卯以遷都詔中外改元貞元改燕

京爲中都府曰大興汴京爲南京中京爲北京丙辰以司徒圖克

坦恭爲太保領三省事平章政事蕭裕爲右丞相兼中書令右丞

張浩左丞張通古爲平章政事參知政事張中孚爲左丞蕭玉爲

右丞平章政事李德固爲司空左宣徽使劉萼爲參知政事樞密

副使昂為樞密使工部尚書布薩思恭為樞密副使四月辛酉以

右宣徽使赫舍哩薩哈連原作紇石烈撒合輦等為賀宋生日使辛未特封

唐古定格為貴妃戊寅皇太后大氏崩五月辛卯殺弟西京留守

博恰原作蒲家西京兵馬完顏穆喇幹原作盧瓦編修官圓福努通進伯

特原作李迭坐與博恰善并殺之乙卯以京城隙地賜朝官及衛士六

月乙丑以安國軍節度使耶律恕為參知政事七月戊子朔元賜

朝官京城隙地徵錢有差八月壬戌司空李德固薨禁中都路捕

射麋兔戊寅賜營建宮室工匠及役夫帛九月丁亥朔以翰林待

制摩囉歡原作良虎為夏國生日使吏部郎中幹克珊原作台山為高

麗生日使十月丁巳獵于良鄉封料石岡神為靈應王初海陵嘗

過此祠持杯琰禱曰使吾有天命當得吉卜投之吉又禱曰果如

所卜他日當有報否則毀爾祠宇投之又吉故封之戊午還宮壬

戊有司言太后園陵未畢合停冬享及祫祭從之丙子命內外官
聞大功以上喪止給當日假若父母喪聽給假三日著爲令十一
月丙戌朔定州獻嘉禾詔自今不得復進己丑瑤池殿成丙申以
戶部尙書蔡松年等爲賀宋正旦使戊戌左丞相諾延温都思忠
致仕庚戌以樞密使昂爲左丞相樞密副使布薩思恭爲樞密使
十二月太白經天戊午特賜貴妃唐古定格家奴孫梅進士及第
壬戌以簽書樞密院事納蘇原作南撒爲樞密副使辛未封所納皇叔
曹國王宗敏妃阿蘭原作阿懶爲昭妃丙子貴妃唐古定格坐與舊奴
姦賜死閏月乙酉朔殺護衛特默格原作特默葛癸巳定社稷制度太
白經天癸卯以太保領三省事圖克坦恭爲太師領三省事如故
命西京路統軍達蘭西北路招討蕭懷忠臨潢府總管馬和尚烏
爾古德喀勒司招討舍音等北巡

二年正月甲寅朔上不豫不視朝賜宋高麗夏使就館燕庚申太

白經天尚書右丞相蕭裕與前真定尹蕭豐嘉努原作馮家奴前御史

中丞蕭珠展原作招折博州同知約索等謀反伏誅詔中外己巳生辰

宋高麗夏遣使來賀二月甲申朔以平章政事張浩為尚書右丞

相兼中書令甲午以尚書右丞蕭玉為平章政事前河南路統軍

使張暉為尚書右丞西北路招討使蕭海呼原作好胡為樞密副使三

月戊辰夏遣使賀遷都丙戌幸大興府及都轉運使司遣薦含桃

于衍慶宮五月癸丑朔日有食之避正殿敕百官勿治事己未詔

自今每月上七日不奏刑名尚食進饌不進肉丁卯始置交鈔庫

設使副員丁丑太原尹圖克坦額略楚克伏誅命其子珠蘇拉原作

木斯刺乘傳焚其骨擲水中七月庚申初設鹽鈔香茶文引印造庫

使副丙子參知政事耶律恕罷八月丙午以左丞相昂去衣杖其

弟婦命杖之戊申以御史大夫高楨爲司空御史大夫如故九月
己未常武殿擊鞠令百姓縱觀辛酉以吏部尙書蕭績爲參知政
事癸亥獵于近郊丁卯次順州太師領三省事圖克坦恭薨是夜
還宮乙亥復獵近郊十月庚辰朔殺廣寧尹韓王亨庚寅還宮庚
子以左丞相致仕溫都思忠起爲太傅領三省事以刑部侍郎白
彥恭等爲賀宋正旦使十一月戊辰上命諸從姊妹皆分屬諸妃
出入禁中與爲淫亂卧內徧設地衣裸逐爲戲是月初置惠民局
高麗遣使謝賜生日十二月乙酉以太傅溫都思忠爲太師領三
省事如故平章政事張通古爲司徒平章政事如故

三年正月己酉朔宋高麗夏遣使來賀辛酉以判東京留守大臬
爲太傅領三省事甲子生辰宋高麗夏遣使來賀二月壬午以左
丞相昂爲太尉樞密使右丞相張浩爲左丞相兼侍中樞密使布

薩思恭爲右丞相兼中書令尙書左丞張中孚罷右丞張暉爲平
章政事參知政事劉萼爲左丞參知政事蕭曠爲右丞吏部尙書
蔡松年爲參知政事三月壬子以左丞相張浩平章政事張暉每
見僧法寶必坐其下失大臣體各杖二十僧法寶妄自尊大杖二
百乙卯命以大房山雲峰寺爲山陵建行宮其麓庚午以左司郎
中李通爲賀宋生日使夏四月丁丑朔昏霧四塞日無光凡十有
七日五月丁未朔日有食之癸丑南京大內火乙卯命判大宗正
事京等如上京奉遷太祖太宗梓宮丙寅如大房山營山陵六月
丙戌登寶昌門觀角抵百姓縱觀乙未命右丞相布薩思恭太宗
正丞哈布爾原作胡拔魯如上京奉遷山陵及迎永壽宮皇太后七月
癸丑太白晝見辛酉如大房山杖提舉營造官吏部尙書耶律安
禮等乙亥還宮八月壬午如大房山甲申啟土賜役夫人絹一疋

是日還宮甲午遣平章政事蕭玉迎祭祖宗梓宮於廣寧乙未增
置教坊人數庚子杖左宣徽使敬嗣暉同知宣徽事烏居仁及尙
食官九月戊申平章政事張暉迎祭梓宮于宗州乙卯上謂宰臣
及左司官曰朝廷之事尤在慎密昨授張中孚趙慶襲官除書未
到先已知之皆汝等泄之也敢復爾者殺無赦己未如大房山庚
申還宮丙寅以殿前都點檢納哈塔原作納合椿年爲參知政事丁卯
上迎梓宮及皇太后於沙流河命左右持杖二束跪太后前曰亮
不孝久失溫清願痛笞之太后掖起之曰凡民有子克家猶愛之
況我有子如此叱持杖者退庚午獵親射麀以薦梓宮壬申至自
沙流河十月丙子皇太后至中都居壽康宮戊寅權奉安太廟神
主於延聖寺致奠梓宮于東郊舉哀己卯梓宮至中都以大安殿
爲丕承殿安置壬午命省部諸司便服治事不奏死刑一月辛卯

告于丕承殿乙未如菽宮冊諡永寧皇太后曰慈憲皇后丁酉大
房山行宮成名曰磐寧戊戌還宮己亥以翰林學士承旨耶律歸
一等爲賀宋正旦使十一月己巳朔梓宮發丕承殿戊申山陵禮
成甲寅詔內外大小職官覃遷一重貞元四年租稅並與放免軍
士久于屯戍不經替換者人賜絹三疋銀三兩羣臣稱賀丙辰燕
百官於泰和殿丁卯奉安神主於太廟戊辰羣臣稱賀辛未獵于
近郊十二月己丑還宮薦冰乙未上朝太后于壽康宮己亥太傅
領三省事大臯薨親臨哭之命有司廢務及禁樂三日

正隆元年正月癸卯朔宋高麗夏遣使來賀己酉羣臣奉上尊號
曰聖文神武皇帝上自九月廢朝常數月不出有急奏召左右司
郎中省于卧内庚戌始視朝戊午生辰宋高麗夏遣使來賀乙丑
觀角抵戲罷中書門下省以太師領三省事温都思忠爲尙書令

太尉樞密使昂爲太保右丞相布薩思恭爲太尉樞密使左丞劉
萼右丞蕭隲罷參知政事蔡松年爲尙書右丞樞密副使蕭懷忠
罷吏部尙書耶律安禮爲樞密副使平章政事蕭玉爲右丞相平
章政事張暉罷不置平章政事官二月癸酉朔改元正隆大赦庚
辰御官華門觀迎佛賜諸寺僧絹五百疋綵五十段銀五百兩辛
巳改定內外諸司印記乙未司徒張通古致仕庚子謁山陵辛丑
還都三月壬寅朔始定職事官朝參等格仍罷兵衛庚申以左宣
徽使敬嗣暉等爲賀朱生日使四月太尉樞密使布薩思恭以父
憂起復如故五月辛亥修容安氏閣女御爲妖所憑舞譟宮中命
殺之是月頒行正隆官制六月庚辰天水郡公趙桓薨丙戌以尙
書右丞蔡松年爲左丞樞密副使耶律安禮爲右丞駙馬都尉烏
庫哩當堪爲樞密副使七月己酉命太保昂如上京奉遷始祖以

下梓宮八月丁丑如大房山行視山陵十月乙酉葬始祖以下十

帝于大房山丁酉還宮閏月己亥朔山陵禮成羣臣稱賀甲辰回

鶻使使揚珠烏塔原作寅木烏籠骨來貢庚寅杖右丞相蕭玉左丞蔡

松年右丞耶律安禮御史中丞馬諷等十一月己巳朔以右司郎

中梁鈿等為賀宋正旦使癸巳禁二月八日迎佛

二年正月戊辰朔宋高麗夏遣使來賀庚辰太白晝見癸未生辰

宋高麗夏遣使來賀庚寅以工部侍郎韓錫同知宣徽院事錫不

謝杖百二十奪所授官二月辛丑初定太廟時享牲牢禮儀癸卯

改定親王以下封爵等第命置局追取存亡誥身存者二品以上

死者一品參酌削降公私文書但有王爵字者皆立限毀抹雖墳

墓碑志並發而毀之三月丙寅朔高麗遣使賀受尊號四月戊戌

追降景宣皇帝為遼王以簽書宣徽院事張喆為橫賜高麗使宿

直將軍温都

原作温敦

幹罕

原作幹喝

爲橫賜夏國使六月乙未參知政事

納哈塔椿年薨以禮部尙書耶律守素等爲賀宋生日使八月癸

卯置登聞院甲寅罷上京留守司九月乙丑以宿直將軍布薩烏

呀赫

原作烏里黑

爲夏國生日使戊子罷護駕軍置龍翔虎步軍罷尙

書省文資令史出爲外官是秋中都山東河東蝗十月壬寅命會

寧府毀舊宮殿諸大族第宅及儲慶寺仍夷其址而耕種之丁未

禁賣古器入他境乙卯初鑄銅錢十二月辛未以侍衛親軍副指

揮使高珠巴克

原作助不古

等爲賀宋正旦使十二月己亥以侍衛親

軍都指揮使赫舍哩良弼爲參知政事

三年正月壬戌朔宋高麗夏遣使來賀丙寅子舒蘇鄂博

原作矧思阿不

死殺太醫副使謝友正及其乳母等丁丑生辰宋高麗夏遣使來

賀己卯杖右諫議大夫楊伯雄二月壬辰朔都城及京兆初置錢

監甲午遣使檢視隨路金銀銅鐵冶三月辛酉朔司天奏日食候
之不見命自今遇日食面奏不須頒告辛巳以兵部尙書蕭恭等
爲賀宋生日使四月丙辰樞密副使烏庫哩當堪罷以北京留守
張暉爲樞密副使六月壬辰蝗入京師七月庚申封子廣陽爲滕
王甲申以右丞相蕭玉爲司徒尙書左丞蔡松年爲右丞相右丞
耶律安禮爲左丞參知政事赫舍哩良弼爲右丞左宣徽使敬嗣
暉戶部尙書李通爲參知政事九月己未太白經天甲子滕王廣
陽薨庚午以宿直將軍阿勒巴原作阿魯保爲夏國生日使丁丑以教
坊提點高存福爲高麗生日使辛巳遷中都屯軍一明安於南京
遣吏部尙書李惇等分地安置十月戊戌詔尙書省凡事理不當
者許詣登聞檢院投狀院類奏覽訖付御史臺理問十一月辛酉
以工部尙書蘇保衡等爲賀宋正旦使癸亥詔有司勤政安民癸

未尙書左丞耶律安禮罷參知政事李通以憂制起復如故詔左丞相張浩參知政事敬嗣暉營建南京宮室十二月乙卯以樞密副使張暉爲尙書左丞歸德尹致仕高昭和碩起爲樞密副使四年正月丙辰朔宋高麗夏遣使來賀上朝太后于壽康宮丁巳御史大夫高楨薨庚申更定私相越境法並論死辛酉罷鳳翔唐鄧穎蔡鞏洮膠西諸榷場置場泗州辛未生辰宋高麗夏遣使來賀二月己丑以左宣徽使許霖爲御史大夫丁未修中都城造戰船于通州詔諭宰臣以伐宋事調諸路明安穆昆軍年二十以上五十以下者皆籍之雖親老丁多亦不許留侍三月丙辰朔遣兵部尙書蕭恭經畫夏國邊界遣使分詣諸道總管府督造兵器四月辛丑命增山東路泉水畢括兩營兵士廩給庚戌詔諸路舊貯軍器並致于中都時方建宮室於南京又中都與四方所造軍器

材用皆賦於民箭翎一尺至千錢村落間往往椎牛以供筋革至於烏鵲狗彘無不被害辛亥尙書右丞張暉御史大夫許霖罷以大興尹圖克坦貞爲樞密副使以祕書監王可道等爲賀宋生日使八月詔諸路調馬以戶口爲差計五十六萬餘疋富室有至六十疋者仍令戶自養飼以俟己卯尙書右丞相蔡松年薨九月以翰林待制完顏德濟爲高麗生日使宿直將軍瓜爾佳達蘭爲夏國生日使十月乙亥獵于近郊觀造船于通州賜尙書右丞赫舍哩良弼樞密副使圖克坦貞佩刀入宮十一月甲辰以翰林侍講學士施宜生等爲賀宋正旦使十二月乙卯宋遣使告母韋氏哀甲子太白晝見乙丑以左副點檢大懷忠等爲宋弔祭使乙亥太醫使祁宰上疏諫伐宋殺之

五年正月庚辰朔宋高麗夏遣使來賀乙未生辰宋高麗夏遣使

來賀二月壬子宋遣使獻母后遺留物丁卯太白晝見辛未河東

陝西地震鎮戎德順軍大風壞廬舍人多壓死甲戌遣引進使高

植刑部郎中海古勒原作海狗分道監視所獲盜賊並凌遲處死或鋸

灼去皮截手足仍戒屯戍千戶穆昆等後有獲者並處死總管府

官亦決罰三月辛巳東海縣民張旺徐元等反遣都水監徐文步

軍指揮使張宏信同知大興尹事李惟忠宿直將軍蕭阿古原作阿窳

率舟師九百浮海討之命之曰朕意不在一邑將試舟師耳庚子

以司徒判大宗正事蕭玉為御史大夫司徒如故尚書右丞赫舍

哩良弼為左丞橫海軍節度使致仕劉長言起為右丞四月庚戌

昭妃富察阿里庫原作阿里忽有罪賜死甲寅宿州防禦使耶律翼使

宋失體杖二百除名甲戌太白晝見六月徐文等破賊張旺徐元

東海平七月辛巳詔東海縣徐元張旺誣誤者並釋之壬午以張

宏信被命討賊稱疾逗遛萊州與妓樂飲燕杖之二百癸卯遣使
簽諸路漢軍八月丙午朔日有食之辛亥命權貨務并印造鈔引
庫起赴南京己巳樞密副使圖克坦貞罷以太子少保圖克坦永
年爲樞密副使辛未謁山陵見獲者問其豐耗以衣賜之九月己
卯還宮十月庚午遣護衛完顏布琳原作普連等二十四人督捕山東
河東河北中都盜賊籍諸路水手得三萬人十一月乙酉以濟南
尹布薩烏哲原作烏者等爲賀宋正旦使尙書右丞劉長言罷命親軍
司以所掌付大興府置左右驍騎都副指揮使隸點檢司步軍都
指揮使隸宣徽院十二月癸丑禁中都河北山東河南河東京兆
軍民網捕禽獸及畜養鷓隼者戊辰禁朝官飲酒犯者死三國人
使燕飲者罪

六年正月甲戌朔宋高麗夏遣使來賀丁丑判大宗正圖克坦貞

益都尹京安武軍節度使爽金吾衛上將軍阿蘇原作阿速飲酒以貞

近屬杖七十餘皆杖百壬午上將如南京以司徒御史大夫蕭玉

為大興尹司徒如故樞密副使圖克坦永年罷都點檢赫舍哩志

寧為樞密副使己丑生辰宋高麗夏遣使來賀癸丑命參知政事

李通諭宋使徐度等曰朕昔從梁王軍樂南京風土常欲巡幸今

營繕將畢功期以二月末先往河南帝王巡守自古有之以淮右

多隙地欲校獵其間從兵不踰萬人况朕祖宗陵廟在此安能久

於彼乎汝等歸告汝主令有司宣諭朕意使淮南之民無懷疑懼

庚子詔自中都至河南府所過州縣調從獵騎士二千辛丑殺富

察阿古岱原作阿虎迭女徹辰原作文察徹辰慶宜公主出幼鞠宮中上屢

欲納之太后不可至是以罪殺之二月乙巳杖衛王襄之妃及左

宣徽使許霖甲寅以參知政事李通為尚書右丞己未禁扈從縱

獵擾民庚申徵諸道水手運戰船癸亥發中都丙寅次安肅州三月己卯改河南北却山爲太平山稱舊名者以違制論丁亥將至獲嘉有男子上書言事斬之所言莫得聞癸巳次河南府因出獵幸汝州温湯視行宮地自中都至河南所過麥皆爲空復禁扈從毋輒離次及游賞飲酒犯者罪皆死而莫有從者詔內地諸明安赴山後牧馬俟秋並發弟充之妻烏雅原作烏延氏有罪賜死烏雅氏之弟南京兵馬副都指揮使實訥原作習泥亦以罪誅四月丁未詔百官先赴南京治事尙書省樞密院大宗正府勸農司太府少府皆從行吏戶兵刑部四方館都水監大理司官各留一員以簽書樞密院事高景山等爲賀宋生日使戊申詔汝州百五十里內州縣量遣商賈赴温湯置市詔有司移問宋人蔡穎壽諸州對境創置堡戍者庚戌發河南府契丹本布原作不補白山馳下伏道左自陳破

東海賊有功爲李惟忠所抑立命斬之丁卯次温湯誠扈從毋輒

過汝水上獵奔鹿突之墮馬嘔血數日遣使徵諸道兵五月庚辰

太師尙書令諾延温都思志薨契丹諸部反遣右將軍蕭圖喇原作

秃刺等討之六月癸卯命樞密使布薩思恭西京留守蕭懷忠將兵

一萬討契丹諸部上自汝州如南京壬戌次南京近郊左丞相張

浩率百官迎謁是夜大風壞承天門鴟尾癸亥上備法駕入于南

京七月丁亥以左丞相張浩爲太傅尙書令司徒大興尹蕭玉爲

尙書左丞相吏部尙書白彥恭爲樞密副使樞密副使赫舍哩志

寧爲開封尹安武軍節度使圖克坦貞爲御史大夫己丑賜從駕

從行軍及千戶穆昆錢帛大括天下羸馬殺亡遼耶律氏宋趙氏

子男凡百三十餘人八月壬寅單州賊杜奎據城叛遣都點檢耶

律湛右驍騎副都指揮使大磐討之以樞密副使白彥恭爲北面

兵馬都統開封尹赫舍哩志寧副之中都留守完顏古雲原作爲

西北面兵馬都統西北路招討使唐古布古德原作李副之討契

丹癸丑以諫伐宋弒皇太后圖克坦氏于寧德宮命卽宮中焚之

棄其骨水中并殺其侍婢等十餘人癸亥殺右將軍蕭圖喇護衛

十人長鄂勒博原作幹族樞密使布薩思恭北京留守蕭蹟西京

留守蕭懷忠杖尙書令張浩左丞相蕭玉以太常博士張崇爲高

麗生日使蕭誼忠爲夏國生日使甲子封所幸太后侍婢高福娘

爲鄖國夫人九月庚午朔以太保判太宗正事昂爲樞密使太保

如故戊子殺前壽州刺史摩囉歡原作毛庚寅大名府賊王九據

城叛衆至數萬所至盜賊蜂起大者連城邑小者保山澤或以十

數騎張旗幟而行官軍莫敢近上又惡聞盜賊事言者輒罪之上

自將三十二總管兵伐宋進自壽春以太保樞密使昂爲左領軍

大都督尙書右丞李通副之尙書左丞赫舍哩良弼爲右領軍大
都督判大宗正烏雅富將琿副之御史大夫圖克坦貞爲左監軍
同判大宗正事圖克坦永年爲右監軍左宣徽使許霖爲左都監
河南尹富察鄂倫爲右都監皆從工部尙書蘇保衡爲浙東道水
軍都統制益都尹正嘉副之淨海趨臨安太原尹劉萼爲漢南道
行營兵馬都統制濟南尹布薩烏哲副之進自蔡州河中尹圖克
坦喀齊喀

原作
合喜

爲西蜀道行營兵馬都統制平陽尹張中彥副之

由鳳翔取散關駐軍俟命武勝武平武捷三軍爲前鋒圖克坦貞
別將兵二萬人淮陰甲午上發南京皇后及太子光英居守尙書
令張浩左丞相蕭玉參知政事敬嗣暉留治省事丙申太白晝見
將士自軍中亡歸者相屬于道哈斯罕明安福壽東京穆昆金住
等始授甲于大名卽舉部亡歸從者衆至萬餘皆公言於路曰我

輩今往東京立新天子矣十月乙巳陰迷失道二鼓始達營所丙
午慶雲見東京留守曹國公烏祿卽位于遼陽改元大定大赦數
海陵過惡弒皇太后圖克坦氏殺太宗及宗翰宗弼子孫宗本諸
王毀上京宮室殺遼豫王宋天水郡王郡公子孫等數十事丁未
大軍渡淮將至廬州獲白鹿以爲武王白魚之兆漢南道劉萼取
通化軍蔣州信陽軍圖克坦貞敗宋王權于盱眙進取揚州前鋒
軍至段寨宋戍兵皆逃去敗宋兵于蔚子橋敗宋兵于巢縣斬首
二百級至和州王權夜以兵千餘來襲射卻之翼日雨宋人焚積
聚宵遯詰旦追之宋人逆戰明安韓棠軍卻遂失利温都敖拉原作
刺奔北武健軍副總管阿薩爾原作率明安穆昆力戰卻之王權
退保南岸癸亥上次和州阿薩爾等行賞有差西蜀道圖克坦喀
齊喀駐散關宋人攻秦州臘家城德順州克之浙東道蘇保衡與

宋人戰于海道敗績副統制正嘉死之十一月庚午左司郎中鄂

博庫

原作兀不喝

等聞赦入白東京卽位改元事上拊髀歎曰我本欲

滅宋後改元大定豈非天命乎出其書示之卽預志改元事也以
勸農使完顏元宜爲浙西道兵馬都統制刑部尙書郭安國副之
上駐軍江北遣武平總管阿林先渡江至南岸失利上還和州遂
進兵揚州甲午會舟師于瓜洲渡期以明日渡江乙未浙西兵馬
都統制完顏元宜等軍反帝遇弒崩年四十海陵在位十餘年每
飾情貌以御臣下卻尙食進鵝以示儉及游獵頓次不時需索一
鵝一鶉民間或用數萬售之有以一牛易一鶉者或以敝衾覆衣
以示近臣或服補綴令記注官見之或取軍士陳米飯與尙食同
進先食軍士飯幾盡或見民車陷泥澤令衛士下挽俟車出然後
行與近臣燕語輒引古昔賢君以自況顯責大臣使進直言使張

仲軻輩爲諫官而祁宰竟以直諫死比昵羣小官賞無度左右有曠僚者人或以名呼之卽授以顯階常置黃金裊褥間有喜之者令自取之而淫嬖不擇骨肉刑殺不問有罪至營南京宮殿運一木之費至二千萬牽一車之力至五百人宮殿之飾徧傅黃金而後間以五采金屑飛空如落雪一殿之費以億萬計成而復毀務極華麗其南征造戰艦江上毀民廬舍以爲材煮死人膏以爲油殫民力如馬牛費財用如土苴空國以圖人國遂至於敗都督府以其樞置之南京班荆館大定二年降爲海陵郡王諡曰煬二月世宗使實達爾羅索與南京官遷其樞於寧德宮四月葬于大房山鹿門谷諸王兆域中二十年熙宗旣耐廟有司奏曰煬王之罪未正準晉趙王倫廢惠帝自立惠帝反正誅倫廢爲庶人煬帝罪惡過於倫不當有王封亦不當在諸王塋域乃詔降爲海陵庶人

改葬于山陵西南四十里

贊曰海陵智足以拒諫言足以飾非欲爲君則弑其君欲伐國則弑其母欲奪人之妻則使之殺其夫三綱絕矣何暇他論至於屠滅宗族翦刈忠良婦姑姊妹盡入嬪御方以三十二總管之兵圖一天下卒之戾氣感召身由惡終使天下後世稱無道主以海陵爲首可不戒哉可不戒哉

金史卷五

金史卷五考證

天德二年四月遣使殺周宋國王宗翰子孫三十餘人 按周宋

原本訛周本今據舊本改正

三年五月秉德弟嘉哩等 按嘉哩原文作紕里此處又作紕里

罕考秉德本傳其弟名紕里無罕字則罕字爲等字之訛今併

改

貞元元年三月工部尙書布薩思恭爲樞密副使 思恭原本訛

師恭今據本傳改

正隆元年五月修容安氏閭女御爲妖所憑 按女御原本訛安

御蓋因上文安字致誤今改正

六年八月中都留守完顏古雲爲西北面兵馬都統 按古雲原

文作毅英此處又訛毅亨考本傳係一人今併改

六年九月河中尹圖克坦喀齊喀爲西蜀道行營兵馬都統制
按喀齊喀原文作合喜此處又訛合嘉考本傳係一人今併改

金史卷六

元中書右丞相總裁托克托等修

本紀第六

世宗上

世宗光天興運文德武功聖明仁孝皇帝諱雍本諱烏祿太祖孫睿宗子也母曰貞懿皇后李氏天輔七年癸卯歲生于上京體貌奇偉美鬚髯長過其腹胸間有七子如北斗形性仁孝沉靜明達善騎射國人推爲第一每出獵蒼老皆隨而觀之皇統間以宗室子例授光祿大夫封葛王爲兵部尙書天德初判會寧牧明年判大宗正事改中京留守俄改燕京未幾爲濟南尹貞元初爲西京留守三年改東京進封趙王正隆二年例降封鄭國公進封衛國三年再任留守徙封曹國六年五月居貞懿皇后喪一日方寢有

紅光照室及黃龍見寢室上又嘗夜有大星流入留守第中是歲
東梁水漲溢暴至城下水與城等決女牆石罅中流入城湍激如
涌城中人惶駭上親登城舉酒酌之水退海陵南伐天下騷動是
時籍契丹部人丁壯爲兵部人不願行以告使者使者蘇赫原作
畏海陵不以告部人遂反至是咸平府穆昆瓜里攻陷韓州據咸
平將犯東京八月起復東京留守博索路兵四百來會討瓜里復
得城中子弟願爲兵者數百人帝舅興中少尹李石以病免家居
遼陽戊午發東京以石主留務賊覘者聞鼙鼓聲震天見旌旗蔽
野傳言國公兵十萬且至賊衆至瀋州遯去會烏雅扎拉等敗賊
兵還至常安縣海陵使博索路總管完顏默原作來討賊以兵
屬之九月至東京副留守高存福其女在海陵後宮海陵使存福
伺起居適以造兵器餘材造甲數十存福宣言留守何爲造甲密

使人以白海陵遂與推官李彥隆託爲擊毬謀不利存福家人以

其謀來告平定知軍李富色克原作蒲 速越亦言其事海陵嘗聞上有

疾卽使近習來觀動靜至是又使摩囉歡圖淮北諸王上知之心

常隱憂及討瓜里還至濟河遇故吏魯爾錦原作六斤乘傳自南來具

言海陵殺其母殺兄子塔納原作僧奴阿里布原作阿里白及樞密使布薩

呼圖等又曰且遣人來害宗室兄弟矣上聞之益懼及聞存福圖

已事且有迹李石勸上早圖之於是以議備賊事召官屬會清安

寺彥隆先到存福累召始來並於座上執之是月復有雲來自西

黃龍見雲中十月辛丑南征萬戶完顏福壽高忠建盧萬嘉努等

自山東率所領兵二萬完顏默音自長安率兵五千皆來附默音

卽以臣禮上謁乙巳諸軍入城共擊殺存福等是夜諸軍被甲環

衛皇城丙午慶雲見官屬諸軍勸進固讓良久於是親告于太祖

廟還御宣政殿卽皇帝位以完顏默音爲右副元帥高忠建元帥

左監軍完顏福壽右監軍盧萬嘉努原作萬家奴顯德軍節度使丁未

大赦改元大定下詔暴揚海陵罪惡數十事已酉饗將士賜官賞

各有差仍給復三年會寧呼爾哈率賓原作速頻等路南伐諸軍會尙

書省奏請以從軍來者補諸局司承應人及官吏闕員上曰舊人

南征者卽還何以處之必不可闕者量用新人可也辛亥以利涉

軍節度使通吉義爲參知政事中都留守西北面行營都統完顏

古雲將兵三萬駐歸化以爲左副元帥丁巳出內府金銀器物贍

軍吏民出財物佐官用者甚衆壬戌以前臨潢尹晏爲左丞相癸

亥詔諭南京太傅尙書令張浩甲子興平軍節度使張元素上謁

尙書省奏正隆軍興之餘進錢粟者宜量授以官從之詔遣伊喇

扎巴原作移刺札八招契丹諸部爲亂者以前肇州防禦使實圖美爲元

帥右都監十一月己巳朔以左丞相晏兼都元帥辛未以戶部尙

書李石為參知政事己卯詔調民間馬充軍用事畢還主死者給

價阿蘇原作阿瑱璋殺同知中都留守事薩勒扎原作沙離只阿蘇自稱中

都留守璋自稱同知留守事使厚嘉努原作後家奴等來上表賀辛巳

以如中都期日詔羣臣壬午詔中都都轉運使左淵曰凡宮殿張

設毋得增置無役一夫以擾百姓但謹圍禁嚴出入而已以尙書

右司員外郎完顏烏肯徹原作兀古出為詔諭高麗使癸未遣權元帥

左都監烏哲庫原作吾札忽右都監實圖美廣寧尹布薩歡塔原作僕散渾坦

討契丹諸部甲申追尊皇考幽王為皇帝諡簡肅廟號睿宗皇妣

富察氏曰欽慈皇后李氏曰貞懿皇后羣臣上尊號曰仁明聖孝

皇帝乙酉追復東昏王帝號諡武靈廟號閔宗詔中外封子薩喇

勒原作實魯剌為許王呼塔噶原作胡土瓦為楚王戊子辭謁太祖廟及貞

懿皇后園陵己丑如中都次小口使中都留守宗憲先往壬辰次
梁魚務樞密副使北面行營都統白彥敬南京留守北面行營副
都統赫舍哩志寧以所統軍數來上安武軍節度使爽來歸乙未
完顏元宜等弒海陵於揚州丙申次義州丁酉宋人破陝州防禦
使折可直降同知防禦使事李柔立死之十二月乙卯次三河縣
左副元帥完顏古雲來朝丙辰次通州延安尹唐古德溫來朝丁
巳至中都戊午謁太祖廟己未御貞元殿受羣臣朝庚申以元帥
左監軍高忠建等爲報諭宋國使壬戌詔軍士自東京扈從至京
師者復三年同知河間尹高昌福上書陳便宜上覽之再三詔內
外大小職官陳便宜丙寅詔左副元帥完顏古雲規措南邊及陝
西等路事

二年正月戊辰朔日有食之伐鼓用幣上徹樂減膳不視朝庚午

上謂宰相曰進賢退不肖宰相之職也有才能高於已者或懼其

分權往往不肯引置同列朕甚不取卿等毋以此為心以前翰林

學士承旨致仕翟永固為尚書左丞濟南尹布薩忠義為右丞都

統色克原作斜哥此與本卷後之色克非一人副統完顏布呼原作布輝坐擅易置中都

官吏色克除名布呼削兩階罷之辛未御太和殿宴百官宗戚命

婦賜賚有差壬申勅御史臺檢察六部文移稽而不行行而失當

皆舉劾之甲戌除迎賽神佛禁令乙亥如大房山丙子獻享山陵

禮畢欲獵而還左丞相晏等諫曰邊事未寧不宜遊幸戊寅還宮

因諭晏等曰朕常慕古之帝王虛心受諫卿等有言即言毋緘默

以自便辛巳以兵部尚書克實原作可喜等謀反伏誅詔中外是日賜

扈從明安穆昆甲士下至伊勒希原作里喜有差遣左副點檢富察

阿布哈原作阿孝罕等賞賚河南將士以前勸農使伊喇元宜為御

史大夫詔前工部尙書蘇保衡太子少保高思廉振賜山東百姓粟帛無妻者具姓名以聞庚寅行納粟補官法遣右副元帥完顏默音率師討蕭幹罕原作高幹壬辰上謂宰執曰朕卽位未半年可行之事甚多近日全無敷奏朕深居九重正賴卿等贊襄各思所長以聞朕豈有倦怠癸巳太白晝見甲午上謂宰執曰卿等當參民間利害及時事之可否以時敷奏不可公餘輒從自便優游而已命河北山東陝西等路征南步軍並放還家咸平濟州軍三萬人屯京師丙申以西南路招討使完顏思敬兵部尙書阿林督北邊將士二月己亥前翰林待制大穎以言盜賊忤海陵杖而除名起爲秘書丞補闕馬欽以詔事海陵得幸除名庚子詔前戶部尙書梁球戶部郎中耶律道安撫山東百姓招諭盜賊或避賊及避徭役在他所者並令歸業及時農種無問罪名輕重並與原免壬寅

太傅尙書令張浩來見癸卯以上初卽位遣遼陽主簿舒穆魯伊

德原作石抹移送東京麴院都監伊喇格布原作移刺葛補招契丹叛人爲白彥

敬赫舍哩志寧所害並贈鎮國上將軍令其家各食五品俸仍收

錄其子甲辰以張浩爲太師尙書令如故御史大夫伊喇元宜爲

平章政事辛亥定世襲明安穆昆遷授格壬子以太保左領軍大

都督瑣都原作奔賂爲都元帥太保如故癸丑詔降蕭玉敬嗣暉許霖

等官放歸田里甲寅復用進士爲尙書省令史丙辰嵩州刺史舒

穆魯珠德勒原作石抹木突刺敗宋兵於壽安縣丁巳鄭州防禦使富察

世傑取陝州甲子詔都元帥瑣都開府山東經畧邊事澤州刺史

特默格原作特末哥及其妻高福娘伏誅閏月甲戌上謂宰臣曰比聞

外議言奏事甚難朕於可行者未嘗不從自今敷奏勿有所隱朕

固樂聞之戊子上謂宰臣曰臣民上書者多勅尙書省詳閱而不

卽具奏天下將謂朕徒受其言而不行也其亟條具以聞庚寅詔
平章政事伊喇元宜秦州路規措邊事辛卯太和厚德殿火乙未
尚書兵部侍郎溫都珠德勒等與斡罕戰敗于勝州三月癸卯參
知政事通吉義罷元帥左都監圖克坦喀齊喀敗宋師于德順州
甲辰追削李通官職乙巳免南京正隆丁夫貸役錢辛亥以廉平
誠諭中外官吏癸亥詔河南陝西山東昨因捕賊良民被虜爲賊
者釐正之四月己巳右副元帥完顏默音等敗斡罕于長樂辛未
降廢帝亮爲海陵郡王乙亥詔減御膳及宮中食物之半夏國遣
使來賀卽位及進方物及賀萬春節右副元帥完顏默音復敗斡
罕於霧霖河辛巳宴夏使貞元殿故事外國使三節人從皆坐廡
下賜食上察其食不精腆曰何以照遠人之心掌食官皆杖六十
癸未夏使朝辭乞互市從之己丑以左丞相晏爲太尉壬辰詔征

契丹部將士曰應契丹與大軍未戰而降者不得殺傷仍安撫之
後招誘來降者除奴婢以已虜爲定其親屬使各還其家仍官爲
贖之五月丁酉朔以哈斯罕節度使白彥敬爲御史大夫戊戌遣
元帥左監軍高忠建會北征將帥討契丹己亥以臨海軍節度使
赫舍哩志寧爲元帥右監軍右副元帥完顏默音元帥右監軍完
顏福壽坐逗遛召還京師皆罷之壬寅立楚王允迪爲皇太子詔
中外丁巳押軍萬戶費摩阿拉原作裴滿按刺明安伊喇薩爾拉原作移刺沙里
刺敗宋兵于華州六月戊辰命御史大夫白彥敬西北路市馬庚
午以尙書右丞布薩忠義爲平章政事兼右副元帥經畧契丹詔
出內府金銀給征契丹軍用戊寅詔居庸關古北口譏察契丹姦
細捕獲者加官賞己卯詔守禦古北口及石門關庚辰宋遣使賀
卽位壬午右副元帥布薩忠義與斡罕戰于和托戊子以南京留

守赫舍哩良弼爲尙書右丞右副元帥庚寅布薩忠義敗斡罕于

諾爾原作嶺西陷泉獲其弟諾爾原作壬辰以西南路招討使完

顏思敬爲元帥右都監七月丁酉復取原州丙午宋主傳位于子

脊甲寅詔諭契丹丁巳率賓軍士珠勒呼等誣完顏默音子色克

寄書其父謀反以其書上之上覽書曰此誣也止訊告者訊之果

誣也珠勒呼伏誅庚申太尉尙書左丞相晏致仕壬戌詔發濟州

會寧府軍在京師者以五千人赴北京都統府陝西都統璋敗宋

將吳璘于張義堡八月乙丑朔實默克原作奚穆昆實呼原作徐列等

降左監軍高忠建破奚于栲栳山及招降旁近奚六營有不降者

攻破之盡殺其男子以其婦女童孺分給諸軍丁卯永興縣進嘉

禾壬申萬戶温特赫阿魯岱與奚戰于古北口敗焉詔同判大宗

正事完顏默音等禦之癸酉上謂宰臣曰百姓上書陳時政其言

猶有所補卿等位居機要畧無獻替可乎夫聽斷獄訟簿書期會
何人不能唐虞之聖猶務兼覽博照乃能成治正隆專任獨見故
取敗亡朕早夜孜孜冀聞讜論卿等宜體朕意詔百司官吏凡上
書言事或爲有司所抑許進表以聞朕將親覽以觀人材優劣夏
國遣使賀尊號丁丑免齊國妃韓王亨樞密呼圖留守曠等家親
屬在宮籍者詔元帥右都監完顏思敬以所部軍與大軍會討幹
罕乙酉詔左諫議大夫石琚監察御史馮仲尹廉察河北東路丁
亥詔御史臺曰卿等所劾惟諸局行移稽緩及緩於赴局者耳此
細事也自三公以下官僚善惡邪正當審察之若止理細務而畧
其大者將治卿等罪矣契丹老和尚降辛卯罷諸關征稅九月甲
午朔完顏默音擒奚明安和卓原作合住此與本卷後之和卓非一人元帥右都監
圖克坦喀齊喀敗宋將吳璘于德順州乙未詔尙書右丞赫舍哩

良弼以便宜招撫奚契丹之叛者庚子元帥右都監完顏思敬獲
契丹幹罕餘衆悉平以尙書左司員外郎完顏正臣爲夏國生日
使壬寅獵于近郊乙巳以伊喇幹罕平詔中外庚戌改葬睿宗皇
帝壬子以元帥右都監完顏思敬爲右副元帥戊午詔思敬經畧
南邊辛酉奉遷睿宗皇帝梓宮于磐寧宮癸亥元帥右監軍圖克
坦喀齊喀敗宋兵于德順州河南統軍使宗尹復取汝州十月丁
卯以左副元帥完顏古雲爲平章政事戊辰如山陵謁睿宗皇帝
梓宮哭盡哀平章政事右副元帥布薩忠義等還自軍上謁丙戌
以布薩忠義爲尙書右丞相元帥左監軍赫舍哩志寧爲左副元
帥戊子葬睿宗皇帝于景陵大赦己丑詔左副元帥赫舍哩志寧
經畧南邊壬辰華州防禦使富察世傑丹州刺史持嘉原作赤蓋烏蘇
塔克原作胡速魯敗宋兵于德順州十一月癸巳朔詔右丞相布薩忠

義伐宋丁酉第職官廉能汙濫不職各爲三等而黜陟之十二月
乙酉遣尙書刑部侍郎劉仲淵等廉察宣諭東京北京等路

三年正月壬辰朔高麗夏遣使來賀庚子太白晝見王子遣客省

使烏居仁賞勞河南軍士癸丑復取德順州二月甲子詔太子少

詹事楊伯雄等廉問山西路庚午上謂宰相曰灤州饑民流散逐

食甚可矜恤移於山西富民贍濟仍于道路計口給食壬申詔撫

諭陝西庚辰太保都元帥瑣都薨丙戌趙景元等以亂言伏誅庚

寅高麗夏遣使來賀萬春節高麗遣使賀卽位東京僧法通以妖

術亂衆都統府討平之三月丙申中都以南八路蝗詔尙書省遣

官捕之王寅詔戶部侍郎魏子平等九人分詣諸路明安穆昆勸

農及廉問詔臨潢漢民逐食於會寧府濟信等州庚戌詔免去年

租稅四月辛酉朔右副元帥完顏思敬罷丁卯平章政事完顏古

雲御史大夫白彥敬罷以參知政事李石爲御史大夫丁丑詔吏
犯贓罪雖會赦不敘己卯以引進使韓綱爲橫賜高麗使乙酉振
山西路明安穆昆貧民給六十日糧是月取商虢環州宋所侵一
十六州至是皆復五月辛卯朔右丞相布薩忠義朝京師乙未以
重五幸廣樂園射柳命皇太子親王百官皆射勝者賜物有差上
復御常武殿賜宴擊毬自是歲以爲常丙申宋人攻破靈璧虹縣
己亥罷河南山東陝西統軍司置都統副統以太子詹事完顏守
道從皇太子召諭守道曰卿任執政所責非輕自今毋從行辛
丑以右丞相布薩忠義兼都元帥癸卯布薩忠義還軍河南路都
統奚托卜嘉叛入于宋丙午宋人攻破宿州辛亥更定出征軍逃
亡法尙書省請籍天德間被誅大臣諸奴隸及從幹罕亂者爲軍
上以四方甫定民意稍蘇而復簽軍非長策不聽癸丑詔諭契丹

餘黨富色克等如能自新並釋其罪若執富色克父子以來者仍

官賞之左副元帥赫舍哩志寧復取宿州河南副統富珠哩原作李木

魯定方死于陣乙卯以北京留守完顏思敬復為右副元帥中都

蝗詔參知政事完顏守道按問大興府捕蝗官六月庚申朔日有

食之以刑部尚書蘇保衡為參知政事丙子詔曰正隆之末濟州

路逃回軍士為中都官軍所邀殺者官為收葬已卯觀稼于近郊

甲申太師尚書令張浩罷以宿直將軍珠勒根原作阿勒根呼雅克原作

和為橫賜夏國使七月庚戌太白晝見以太子太師宗憲為平章

政事以孔總襲封衍聖公八月丙寅太白經天庚午詔曰祖宗時

有勞効未曾遷賞者五品以上奏聞六品以下及無職事者尚書

省約量升除甲戌詔參知政事完顏守道招撫契丹餘黨戊寅詔

罷契丹明安穆昆其尸分隸女直明安穆昆命諸官員年老者許

存馬一二匹餘並括買入宮勅殿前都點檢唐古德温重九出獵

國朝舊俗今扈從軍二千能無擾民可嚴爲約束仍以錢萬貫分

賜之乙酉如大房山丁亥薦享于睿陵戊子還宮癸巳宿直將軍

布薩實訥埒原作僕散爲夏國生日使九月丁酉秋獵以重九拜

天子北郊丙午詔翰林待制劉仲誨等廉問車駕所經州縣乙卯

還宮十月甲子大亨于太廟丙寅以許王府長史伊喇塔富拉原作

佛留爲高麗生日使癸酉冬獵十一月庚寅太白晝見經天王

辰還都戊申詔求仕官輒入權要之門追一官仍降除以請求有

所饋獻及受之者具狀奏裁庚戌百官請上尊號不允詔中都平

州及饑荒地并經契丹剽掠有質賣妻子者官爲收贖壬子尙書

左丞翟永固罷癸丑罷貢金線緞疋甲寅以尙書右丞赫舍哩良

弼爲左丞吏部尙書石琚爲參知政事十二月丁丑臘獵于近郊

以所獲薦山陵自是歲以爲常詔流民未復業增限招誘已卯參知政事蘇保衡至自軍辛巳以爲尙書右丞

四年正月丁亥朔高麗夏遣使來賀戊子罷路府州元日及萬春節貢獻上謂侍臣曰秦王宗翰有功於國何乃無嗣皆未知所對上曰朕嘗聞宗翰在西京坑殺匈奴者千人得非其報耶癸巳百官復請上尊號不允丁酉如安州春水壬寅至安州大獵詔扈從人舍民家者人日支錢一百與其主甲辰元帥府言宋遣審議官胡昉致尙書右僕射書來議和好以其言失信拘昉軍中以書答之及以書進上覽之曰宋人失信行人何罪當卽遣還邊事令元帥府從宜措畫乙巳尙書省奏徐州民曹珪討賊江志而子弼亦在賊中并殺之法當補二官敘雜班上以所奏未當進一官正班用之辛亥獲頭鵝遣使薦山陵自是歲以爲常二月丁巳免安州今

年賦役及保塞縣御城邊吳二村凡扈從人嘗止其家者亦復一
年辛酉獵于高陽之北庚午還都庚辰以北京粟價踴貴詔免今
年課甲三月丙戌朔萬春節高麗夏遣使來賀詔免北京歲課緞
疋一年庚子京師地震壬寅百官復請上尊號不允四月丁巳平
章政事完顏元宜罷甲戌出宮女二十一人五月旱癸卯勅有司
審冤獄禁宮中音樂放毬場役夫乙巳詔禮部尙書王競禱雨于
北岳己酉命參知政事石琚等於北郊望祭禱雨壬子雨斡罕餘
黨富色克伏誅六月甲寅朔日有食之壬戌尙書左丞赫舍哩良
弼至自征南元帥府甲子以雨足命有司祭謝嶽鎮海瀆于北郊
己巳幸東宮視皇太子疾庚午初定祭五嶽四瀆禮辛未觀稼于
近郊庚辰詔諭元帥府曰所請伐宋軍萬五千今以騎三千步四
千赴之詔陝西元帥府議入蜀利害以聞七月壬辰故衛王襄妃

及其子和尙以妖妄伏誅庚子以尙書左丞赫舍哩良弼爲平章政事辛丑大風雷雨拔木八月甲寅朔詔征南元帥府日前所請收復舊疆乞候秋涼進發今己秋涼復俟何時戊午以參知政事完顏守道爲尙書左丞大興尹唐古安禮爲參知政事壬申上謂宰臣曰卿每奏皆常事凡治國安民及朝政不便於民者未嘗及也如此則宰相之任誰不能之己卯如大房山辛巳致祭于山陵九月癸未朔還都乙酉上謂宰臣曰形勢之家親識訴訟請屬道達官吏往往屈法徇情宜一切禁止己丑上謂宰臣曰北京懿州臨潢等路嘗經契丹寇掠平薊二州近復蝗旱百姓艱食父母兄弟不能相保多冒鬻爲奴朕甚憫之可速遣使閱實其數出內庫物贖之乙未幸鷹房主者以鷹隼置內省堂上上怒曰此宰相廳事豈置鷹隼處耶痛責其人俾置他所己亥以宿直將軍烏哩雅

爲夏國生日使辛亥以太子少詹事烏庫哩薩哈爲高麗生日使
十月癸丑朔獵于密雲縣丙寅還都已卯命泰寧軍節度使張宏
信等二十四人分路檢諸路物力十一月乙酉征南都統圖克坦
克寧敗宋兵取楚州己丑封子永功爲鄭王辛卯冬獵乙未詔進
師伐宋戊戌次河間府辛丑尙書省火甲辰次清州閏月壬子朔
還都十二月丁亥尙書省奏都統高景山取商州己丑臘獵于近
郊辛卯太白晝見經天是歲大有年斷死罪十有七人
五年正月辛亥朔高麗夏遣使來賀乙卯詔泰州臨潢接境設邊
堡七十駐兵萬三千己未宋通問使魏杞等以國書來書不稱大
稱姪宋皇帝稱名再拜奉書于叔大金皇帝歲幣二十萬辛未詔
中外復命有司旱蝗水溢之處與免租賦癸酉命元帥府諸新舊
軍以六萬人留戍餘並放還以宋國歲幣悉賞諸軍二月壬午以

左副都點檢完顏仲等爲宋報問使壬寅罷納粟補官令三月戊申萬春節宋高麗夏遣使來賀壬申羣臣奉上尊號曰應天興祚仁德聖孝皇帝詔中外四月癸卯西京留守壽王京謀反獄成特免死杖之除名嵐州安置乙巳右副元帥完顏思敬罷丁未右丞相都元帥布薩忠義還自軍五月壬子左副元帥赫舍哩志寧以召入見丁巳以布薩忠義爲尙書左丞相赫舍哩志寧爲平章政事還軍乙丑以平章政事宗憲爲尙書右丞相癸酉罷山東路都統府以其軍各隸總管府六月甲辰芝產大安殿柱丙午京師地震雨毛七月戊申朔京師地復震罷陝西都統府復置統軍司京兆徙陝西元帥府河中八月己卯前宿州防禦使烏凌阿薩喇原烏林答刺撒以與宋李世輔交通伏誅癸巳宋夏遣使賀尊號九月丁未朔以吏部尙書高衍等爲賀宋生日使戊申秋獵庚戌以宿直

將軍珠格

原作木虎

芬徹

原作蒲查

為夏國生日使甲戌還都十月丁丑朔

地震辛巳以大宗正丞璋為高麗生日使乙未冬獵辛丑還都十

一月丙午朔上謂宰臣曰朕在位日淺未能徧識臣下賢否全賴

卿等盡公舉薦今六品以下殊乏人材何以副朕求賢之意癸丑

幸東宮戊午以右副都點檢烏庫哩尼嗎哈

原作烏古論粘沒喝

為賀宋正

旦使癸亥立諸路通檢地土等第稅法癸酉大霧晝晦十二月已

丑獵于近郊高麗遣使賀尊號

六年正月丙午朔宋高麗夏遣使來賀庚午勅有司宮中張設毋

以塗金為飾二月丁亥尚書左丞相兼都元帥沂國公布薩忠義

薨三月壬寅萬春節宋高麗夏遣使來賀甲寅上如西京庚申次

歸化州西京留守唐古德溫上謁戊辰至西京庚午朝謁太祖廟

壬申擊毬百姓縱觀四月甲戌朔詔月朔禁屠宰戊戌以尚書右

司郎中伊喇道爲橫賜高麗使宿直將軍錫默

原作斜加

果囉

原作

爲

橫賜夏國使辛丑太白晝見五月戊申幸華嚴寺觀故遼諸帝銅

像詔主僧謹視之壬子詔雲中大同縣及警巡院給復一年壬戌

詔將幸銀山諸扈從軍士賜錢五萬貫有敢損苗稼者並償之六

月辛巳太白晝見經天丙戌發自西京庚子獵于銀山七月辛酉

次三叉口八月辛未朔次涼陘庚辰獵于望雲之南山九月辛丑

朔至自西京丁未以戶部尙書魏子平爲賀宋生日使辛亥以翰

林待制伊喇熙載爲夏國生日使澤州刺史劉德裕等以盜用官

錢伏誅壬子太白晝見癸丑尙書右丞相宗憲薨丙辰太白晝見

經天十月己卯以尙書兵部侍郎伊喇諳達爲高麗生日使甲申

朝享于太廟詔免雄莫等州今年租壬辰太白晝見經天丁酉如

安肅州冬獵十一月丙午還都癸丑以右副都點檢烏庫哩元忠

爲賀宋正旦使上謂宰臣曰朝官當慎選其人庶可激勵其餘若
不當則啟覬覦之心卿等必知人才優劣舉實才用之庚申太白
晝見經天丁卯參知政事石琚以母憂罷十二月甲戌詔有司每
月朔望及上七日毋奏刑名戊子太白晝見經天甲午泰州民和
卓謀反伏誅丙申以平章政事赫舍哩良弼爲尙書右丞相赫舍
哩志寧爲樞密使

七年正月庚子朔宋高麗夏遣使來賀辛亥石琚起復參知政事
壬子服袞冕御大安殿受尊號冊寶癸丑大赦庚申以元帥左監
軍圖克坦喀齊喀爲樞密副使二月庚寅尙書右丞蘇保衡薨丙
申以參知政事石琚爲尙書右丞三月己亥朔萬春節宋高麗夏
遣使來賀四月戊辰朔日有食之壬辰以御史大夫李石爲司徒
大夫如故五月丙午大興府獄空詔賜錢三百貫爲宴樂之用以

勞之甲寅以北京留守諾延温都烏達

原作赫盜温敦兀帶

為參知政事六

月癸酉命地衣用龍文者罷之七月戊申禁服用金線其織賣者

皆抵罪丙辰幸東宮己未幸東宮視皇太子疾閏月丁卯觀稼于

近郊戊辰越王永中進封許王鄭王永功封隋王永成封藩王甲

戌詔遣秘書監伊喇子敬經畧北邊戊寅幸東宮己卯慶雲環日

壬午觀稼于近郊戊子觀稼于北郊八月辛亥慶雲環日癸丑尙

書右丞相監修國史赫舍哩良弼進太宗實錄上立受之己未如

大房山壬戌致祭睿陵九月乙丑朔還宮己巳右三部檢法官韓

贊以捕蝗受賂除名詔吏人但犯贓罪雖會赦非特旨不敘用以

勸農使富察素囉

原作莎魯窩

等為賀宋生日使辛未參知政事唐古

安禮罷乙亥以宿直將軍唐古呼嚕為夏國生日使庚辰地震辛

巳以都水監李衛國為高麗生日使乙酉秋獵庚寅次保州詔修

起居注王天祺察訪所經過州縣官十月乙未朔上謂侍臣曰近聞朕所幸郡邑曾宴寢堂宇後皆避之此甚無謂可宣諭令仍舊居止戊申還都丁巳上謂宰臣曰海陵不辨人才優劣惟徇已欲多所升擢朕卽位以來以此爲戒止取實才用之近聞蠡州同知伊喇延壽在官汚濫詢其出身乃正隆時鷹房子如鷹房厨人之類可典城牧民耶自今如此局分不得授以臨民職任以御史中丞孟浩爲參知政事是日參知政事諾延溫都烏達薨辛酉勅有司於東宮涼樓前增建殿位孟浩諫曰皇太子雖爲儲貳宜示以儉德不當與至尊宮室相侔乃罷之十一月乙丑朔上謂宰臣曰縣令多非其人令吏部察善惡明加黜陟辛未以河間尹圖克坦克寧等爲賀宋正旦使壬申太白晝見丁丑歲星晝見丁亥樞密副使圖克坦喀齊喀罷十二月戊戌東京留守圖克坦喀齊喀北

京留守完顏默音肇州防禦使富察通朝辭賜通金帶諭曰卿雖
有才用心多詐朕左右須忠實人故命卿補外賜卿金帶者答卿
服勞之久也又顧謂左宣徽使敬嗣暉曰如卿不可謂無才所欠
者純實耳甲辰以北京留守完顏思敬爲平章政事是歲斷死囚
二十八

八年正月甲子朔宋高麗夏遣使來賀乙丑上謂宰臣曰朕治天
下方與卿等共之事有不可各當面陳以輔朕之不逮慎毋阿順
取容卿等致位公相正行道揚名之時苟或偷安自便雖爲今日
之幸後世以爲何如羣臣皆稱萬歲辛未謂秘書監伊喇子敬等
曰昔唐虞之時未有華飾漢惟孝文務爲純儉朕於宮室惟恐過
度其或興修卽損宮人歲費以充之今亦不復營建矣如宴飲之
事近惟太子生日及歲元嘗飲酒往者亦止上元中秋飲之亦未

嘗至醉至於佛法尤所未信梁武帝爲同泰寺奴遼道宗以民戶
賜寺僧復加以三公之官其惑深矣庚辰行皇太子冊禮二月甲
午朔制子爲改嫁母服喪三年上諭左宣徽使敬嗣暉曰凡爲人
臣上欲要君之恩下欲干民之譽必虧忠節卿宜戒之三月癸亥
朔萬春節宋高麗夏遣使來賀己巳命以職官子補令史丁丑命
護衛親軍百戶五十戶非直日不得帶刀入宮己丑太白晝見四
月丙午詔曰馬者軍旅所用牛者農耕之資殺牛有禁馬亦何殊
其令禁之戊申擊毬常武殿司天馬貴中諫曰陛下爲天下主繫
社稷之重又春秋高圍獵擊毬危事也宜悉罷之上曰朕以示習
武耳五月甲子北望淀大震風雨雹廣十里長六十里詔戶工兩
部自今宮中之飾並勿用黃金乙丑上如涼陘丁卯歲星晝見庚
寅改旺國崖曰靜寧山和爾和

原作曷
里嶺

東川曰金蓮川六月河決

李固渡水入曹州七月甲子制盜羣牧馬者死告者給錢三百貫
戊辰上謂平章政事完顏思敬等曰朕思得賢士寤寐不忘自今
朝臣出外卽令體訪外任職官廉能者及草萊之士可以助治者
具姓名以聞甲戌秋獵已卯次三叉口上諭點檢司曰沿路禾稼
甚佳其扈從人少有蹂踐則當汝罪八月乙卯至自涼陁九月辛
酉上諭尙書右丞石琚參政孟浩曰聞蔚州採地葺役夫數百千
人朕所用幾何而擾動如此自今差役凡稱御前者皆須稟奏仍
附冊癸亥以右宣徽使伊喇錫勒塔干原作神獨幹等爲賀宋生日使
已巳以引進使高希甫爲夏國生日使庚午上幸東宮癸酉上諭
宰臣曰卿等舉用人材凡己所知識必使他人舉奏朕甚不喜如
其果賢何必以親疏爲避忌也以戶部尙書魏子平爲參知政事
辛巳上謂御史大夫李石曰臺憲固在分別邪正然內外百司豈

謂無人惟見卿等劾人之罪不聞舉善自今宜令監察御史分別
刺舉善惡以聞上嘗命左衛將軍大磐訪求良弓而磐多自取護
衛羅索以告上命點檢司鞠磐磐妹爲寶林磐屬內侍僧兒言之
寶林寶林以聞命杖僧兒百出磐爲隴州防禦使十月己丑朔以
戒諭官吏貪墨詔中外乙未命涿州刺史兼提點山陵每以朔望
致祭朔則用素望則用肉仍以明年正月爲首及命圖畫功臣於
太祖廟其未立碑者立之以翰林待制靖爲高麗生日使上謂宰
臣曰海陵時修起居注不任直臣故所書多不實可訪求得實詳
而錄之參政孟浩進曰良史直筆君舉必書自古帝王不自觀史
意正在此辛亥詔罷復州歲貢鹿筋十一月乙丑幸東宮以同簽
大宗正事博和托原作關等爲賀宋正旦使十二月戊子朔遣武
定軍節度使伊喇安原作移等招諭準布原作

原作

刺按

移

原作

阻

鞮

九年正月戊午朔宋高麗夏遣使來賀辛酉上與宣徽使敬嗣暉
秘書監伊喇子敬論古今事因曰亡遼日屠食羊三百亦豈能盡
用徒傷生耳朕雖處至尊每當食常思貧民饑餒猶在己也彼身
爲惡而口祈福何益之有如海陵以張仲軻爲諫議大夫何以得
聞忠言朕與大臣論議一事非正不言卿等不以正對豈人臣之
道也庚午詔諸州縣和糴毋得抑配百姓戊寅契丹愛寶拉原作外失
刺等謀叛伏誅丙戌制漢人渤海兄弟之妻服闋歸宗以禮續婚
者聽二月庚寅制妄言邊關兵馬者徒二年丙申詔改葬漢二燕
王於城東庚子以中都等路水免稅詔中外又以曹單二州被水
尤甚給復一年甲寅詔女直人與諸色人公事相關只就女直理
問三月丁巳朔萬春節宋高麗夏遣使來賀丁卯以尙書省定網
捕走獸法或至徒上曰以禽獸之故而抵民以徒是重禽獸而輕

民命也豈朕意哉自今有犯可杖而釋之詔御史中丞伊喇道廉
問山東河南辛未禁民間稱言銷金條理內舊有者改作明金字
辛巳以大名路諸明安民戶艱食遣使發倉廩減價出之四月己
丑謂宰臣曰朕觀在位之臣初入仕時競求聲譽以取爵位亦既
顯達卽狗默苟容爲自安計朕甚不取宜宣諭百官使知朕意癸
巳遣翰林修撰富察烏瑋原作兀虎監察御史完顏和碩原作鶻沙分詣河
北西路大名河南山東等路勸明安穆昆農五月內辰朔以符寶
郎圖克坦懷貞爲橫賜高麗使宿直將軍完顏賽音原作賽也爲橫賜
夏國使戊辰尙書省奏越王永中隋王永功二府有所興造發役
夫上曰朕見宮中竹有枯瘁者欲令更植恐勞人而止二王府各
有引從人力又奴婢甚多何得更役百姓爾等但以例爲請海陵
橫役無度可盡爲例耶自今在都浮役久爲例者仍舊餘並官給

傭直重者奏聞六月庚寅冀州張和等反伏誅戊戌以久旱命宮
中毋用扇庚子雨七月乙卯朔罷東北路採珠壬申觀稼于近郊
八月甲申朔有司奏日食以雨不見伐鼓用幣如常禮九月甲寅
朔以刑部尙書高德基等爲賀宋生日使宿直將軍布薩守中爲
夏國生日使提點司天臺馬貴中爲高麗生日使罷皇太子月料
歲給錢五萬貫上謂臺臣曰比聞朝官內有攬中官物以規貨利
者汝何不言皆對曰不知上曰朕尙知之汝有不知者乎朕若舉
行汝將安用壬戌秋獵十月丁亥還都辛丑以尙書右丞相赫舍
哩良弼爲左丞相樞密使赫舍哩志寧爲右丞相詔宗廟之祭以
鹿代牛著爲令丙午大享于太廟辛亥以平章政事完顏思敬爲
樞密使十一月己未以尙書左丞完顏守道爲平章政事右丞石
琚爲左丞參知政事孟浩爲右丞庚申上幸東宮辛酉以京兆尹

毅等爲賀宋正旦使壬戌冬獵丙子還都十二月丙戌詔振臨潢
泰州山東東路河北東路諸明安民以東京留守圖克坦喀齊喀
爲平章政事丁酉太白晝見辛丑獵近郊丙午制職官犯公罪在
官已承伏者雖去官猶論

十年正月壬子朔宋高麗夏遣使來賀甲子命宮中元宵無得張
燈甲戌以司徒御史大夫李石爲太尉尙書令二月甲午安化軍
節度使圖克坦子溫副使老君努以贓罪誅戊申上謂近臣曰護
衛以後皆是治民之官其令教以讀書三月壬子朔萬春節宋高
麗夏遣使來賀丙辰上因命護衛中善射者押賜宋使射弓宴宋
使中五十押宴者纔中其七謂左右將軍曰護衛十年出爲五品
職官每三日上直役亦輕矣豈徒令飽食安卧而已己矢不習將
焉用之戊午以河南統軍使宗敘爲參知政事庚午上謂參政宗

敘曰卿昨爲河南統軍時言黃河堤埽利害甚合朕意朕每念百姓差調官吏互爲姦弊不早計料臨期星火率斂所費倍蓰爲害非細卿旣參朝政皆當革弊擇利行之又諭左丞石琚曰女直人徑居達要不知閭閻疾苦汝等自丞簿至是民間何事不知凡有利害宜悉敷陳四月丁酉制命婦犯姦不用夫廕以子封者不拘此法五月乙卯如柳河川閏月庚辰夏國任得敬脅其主李仁孝使上表請中分其國上問宰臣李石石等以爲事繫彼國不如許之上曰彼劫於權臣耳詔不許并卻其貢物七月壬午秋獵戊戌放圍場役夫詔扈從糧食並從官給乙巳勅扈從人縱畜牧蹂踐禾稼者杖之仍償其直八月己未至自柳河川壬申遣參知政事宗敘北巡九月庚辰尙書左丞相赫舍哩良弼丁憂起復如故壬午以簽書樞密院事伊喇子敬爲賀宋生日使庚寅戶部郎中瓜

爾佳阿里布

原作夾谷
阿里補

爲夏國生日使十月己酉以大宗正丞堅

原作

爲高麗生日使甲寅如霸州冬獵乙丑上謂大臣曰比因巡

獵聞固安縣令高昌裔不職已令罷之霸州司候成奉先奉職謹
恪可進一階除固安令辛未上謂宰臣曰朕凡論事有未能深究

其利害者卿等宜悉心論列無爲面從而退有後言十一月辛巳
制盜太廟物者與盜宮中物同論甲申上幸東宮丁亥以太子詹
事富察富色克等爲賀宋正旦使癸巳夏國以誅任得敬遣使來
謝詔慰諭之十二月丙寅上謂宰臣曰比體中不佳有妨朝事今
觀所奏事皆依條格殊無一利國之事若一朝行一事歲計有餘
則其利博矣朕居深宮豈能悉知外事卿等尤當注意

十一年正月丙子朔宋夏遣使來賀丁丑封子永升爲徐王永蹈
爲滕王永濟爲薛王壬午詔職官年七十以上致仕者不拘官品

並給俸祿之半丙申命振南京屯田明安被水災者戊戌尙書省
奏汾陽軍節度副使牛信昌生日受饋獻法當奪官上曰朝廷行
事苟不自正何以正天下尙書省樞密院生日節辰饋獻不少此
而不問小官饋獻卽加按劾豈正天下之道自今宰執樞密饋獻
亦宜罷去上謂宰臣曰往歲清暑山西近路禾稼甚廣殆無畜牧
之地因命五里外乃得耕墾今聞民皆去之他所甚可矜憫其命
依舊耕種事有類此卿等宜卽告朕三月乙亥朔萬春節宋夏遣
使來賀辛巳命有司以天水郡公旅櫬依一品禮葬於鞏洛之原
四月丁未歸德府民臧安兒謀反伏誅大理卿李昌圖以廉問真
定尹圖克坦貞咸平尹舒穆魯阿瑪拉原作石抹
河沒刺受賊事旣得實
不卽黜罷杖之四十癸亥參知政事魏子平罷高麗國王峴弟皓
廢其主自立詐稱讓國遣使以表來上五月辛卯詔遣吏部侍郎

靖使高麗問故癸巳以南京留守伊喇成爲樞密副使六月巳酉
詔曰諸路常貢數內同州沙苑羊非急用徒勞民爾自今罷之朕
居深宮勞民之事豈能盡知當具以聞戊午觀稼于近郊甲子平
章政事圖克坦喀齊喀薨七月甲申參知政事宗敘薨八月癸卯
朔太白晝見詔朝臣曰朕嘗諭汝等國家利便治體遺闕皆可直
言外路官民亦嘗言事汝等終無一語凡政事所行豈能皆當自
今直言得失毋有所隱乙巳上謂宰臣曰隨朝之官自謂厯一考
則當得某職兩考則當得某職第務因循碌碌而已自今以外路
官與內除者察其公勤則升用之但苟簡於事不須任滿便以本
品出之賞罰不明豈能勸勉庚戌詔曰應因幹罕被掠女直及諸
色人未經刷放者官爲贖放隱匿者以違制論其年幼不能稱說
住貫者從便住坐上謂宰臣曰五品以下闕員甚多而難於得人

三品以上朕則知之五品以下不能知也卿等曾無一言見舉者欲畫久安之計興百姓之利而無良輔佐所行皆尋常事耳雖日日視朝何益之有卿等宜勉思之己巳以尙書刑部侍郎烏凌阿天錫等爲賀宋生日使近侍局使劉琬爲夏國生日使九月癸未獵于橫山庚寅還都十月壬寅朔以左宣徽使敬嗣暉爲參知政事甲寅上謂宰臣曰朕已行之事卿等以爲成命不可復更但承順而已一無執奏且卿等凡有奏何嘗不從自今朕旨雖出宜審而行有未便者卽奏改之或在下位有言尙書省所行未便亦當從而改之毋拒而不從丙寅尙書左丞相赫舍哩良弼進睿宗實錄戊辰上謂宰臣曰衍慶宮圖畫功臣已命增爲二十八如丞相韓企先自本朝興國以來憲章法度多出其手至於關決大政但與大臣謀議終不使外人知覺漢人宰相前後無比若襄顯之亦

足示勸慎無遺之十一月丁丑以西南路招討使宗寧等爲賀宋
正旦使戊寅幸東宮上謂皇太子曰吾兒在儲貳之位朕爲汝措
天下當無復有經營之事汝惟無忘祖宗純厚之風以勤修道德
爲孝明信賞罰爲治而已昔唐太宗謂其子高宗曰吾伐高麗不
克終汝可繼之如此之事朕不以遺汝如遼之海濱王以國人愛
其子嫉而殺之此何理也子爲衆愛愈爲美事所爲若此安有不
亡唐太宗有道之君而謂其子高宗曰爾於李勣無恩今以事出
之我死宜卽授以僕射彼必致死力矣君人者焉用僞爲受恩於
父安有忘報於子者乎朕御臣下惟以誠實耳羣臣皆稱萬歲丙
戌朝享于太廟丁亥有事于園丘大赦癸巳羣臣奉上尊號曰應
天興祚欽文廣武仁德聖孝皇帝乙未詔中外十二月癸卯冬獵
乙卯還宮丙辰參知政事敬嗣暉薨辛酉進封越王永中趙王隋

王永功曹王濬王永成嗣王徐王永升虞王滕王永蹈徐王薛王
永濟滕王乙丑趙王永中曹王永功俱授明安仍命永功親治事
以習爲政

金史卷六

[Faint bleed-through text from the reverse side of the page, including characters like 王, 臣, 等, 奏, 請, 命, 官, 等]

金史卷六考證

二年三月癸卯 按原本作癸亥是月下文又有癸亥日考本年

正月戊辰朔中間隔二月及閏二月則三月之朔當爲丁酉或

戊戌以下文甲辰推之此處癸亥實爲癸卯之訛今改正

二年四月壬辰詔契丹未戰而降者不得殺傷 原本訛役傷今

據文義改

四年十月癸丑朔原文訛癸亥案是年八月甲寅朔小盡九月癸

未朔大盡則十月朔應爲癸丑若癸亥則多衍一旬矣今改正

五年正月辛亥朔 原文訛辛卯按四年閏十一月爲壬子朔又

十二月內已載有辛卯日則此年正月朔當爲辛亥非辛卯也

今改正

金史卷七

元中書右丞相總裁托克托等修
本紀第七

世宗中

十二年正月庚午朔宋高麗夏遣使來賀戊寅詔有司凡陳言文字皆國政利害自今言有可行以其本封送秘書監當行者錄副付所司丙申以水旱免中都西京南京河北河東山西陝西去年租稅二月壬寅上召諸王府長史諭之曰朕選汝等正欲勸導諸王使之爲善如諸王所爲有所未善當力陳之尙或不從則具某日行某事以奏若阿意不言朕惟汝罪丙午尙書省奏廉察到同知城陽軍事山和尙等清強官上曰此輩暗察明訪皆著政聲可第其政績各進官旌賞其速議升除庚戌上如順州春水癸丑還

都丙辰詔自今官長不法其僚佐不能糾正又不言上者並坐之

戶部尚書高德基濫支朝官俸錢四十萬貫杖八十三月己巳朔

萬春節宋高麗夏遣使來賀乙亥詔尚書省贓汙之官已被廉問

若仍舊職必復害民其遣使諸道即日罷之丁丑詔遣宿直將軍

烏庫哩色埒原作冊封王皓為高麗國王庚寅雨土癸巳以前西

北路招討使伊喇道為參知政事回紇遣使來貢丁酉北京曹貴

等謀反伏誅四月旱癸卯尚書右丞孟浩罷丁巳西北路納哈塔

齊勤原作納合七斤等謀反伏誅癸亥以久旱禱祠山川詔宰臣曰諸府

少尹多闕員當選進士雖資敘未至而有政聲者擢用之以宿直

將軍唐古阿古爾原作唐括阿忽里為橫賜夏國使乙丑大名尹荆王文

以贓罪奪王爵降授德州防禦使回紇使使來貢丙寅尚書右丞

相赫舍哩志寧薨丁卯宋高麗遣使賀尊號準布來貢五月癸酉

上如百花川甲戌命振山東東路和掄原作胡刺温明安民飢丁丑次

珠卜奇原作阻居久旱而雨戊寅觀稼禁扈從蹂踐民田禁百官及承

應人不得服純黃油衣癸未諭宰臣曰朕每次舍凡秣馬之具皆

假於民間多亡失不還其主此彈壓官不職可擇人代之所過卽

令詢問亡失民間物並償其直乙酉詔給西北路人戶牛六月甲

寅如金蓮川九月丙子至自金蓮川辛巳以右副都點檢瓜爾佳

清臣等為賀宋生日使右衛將軍鈕祜祿噶達爾原作粘割特刺為夏

國生日使丁亥太白晝見在日前鄜州李方等謀反伏誅十月高

麗國王王皓遣使謝封冊乙未臨奠故右丞相赫舍哩志寧喪志

寧妻永安縣主進鎧甲弓矢鷹鵠重綵王子召皇太子及趙王永

中上殿上顧謂宰臣曰京嘗圖逆今不除之恐為後患又曰天下

大器歸於有德海陵失道朕乃得之但務修德餘何足慮皇太子

及永中皆曰誠如聖訓遂釋之丙辰以德州防禦使文貲產賜其

兄之子耀珠

原作

且諭其母文之罪汝等皆當連坐念宋王有大

功於國故置不問仍以家產賜汝子十一月甲戌上謂宰臣曰宗

室中有不任官事者若不加恩澤於親親之道有所未宏朕欲授

以散官量予廩祿未知前代何如左丞石琚曰陶唐之親九族周

家之內睦九族見於詩書皆帝王美事也丙子上以曹國公主家

奴犯事死平令劉彥弼杖之主乃折辱令既深責公主又以臺臣

徇勢偷安畏忌不敢言奪俸一月以陝西統軍使璋爲御史大夫

以戶部尙書曹望之爲賀宋正旦使壬午同州民屈立等謀反伏

誅戊子上屏侍臣與宰臣議事記注官亦退上曰史官記人君善

惡朕之言動及與卿等所議皆當與知其於記錄無或有隱可以

朕意諭之十二月乙未朔以濟南尹劉萼在定武軍貪墨不道命

大理少卿張九思鞫之丁酉詔遣官及護衛二十人分路選年二十以上四十以下有門地才行及善射者充護衛不得過百人冀州王瓊等謀反伏誅德州防禦使文以謀反伏誅辛丑出宮女二十餘人已酉樞密副使伊喇成罷辛亥禁審錄官以宴飲廢公務詔金銀坑冶聽民開採毋得收稅癸丑獵于近郊以殿前都點檢圖克坦克寧爲樞密副使己未詔自今除名人子孫有在仕者並取奏裁

十三年正月乙丑朔宋高麗夏遣使來賀癸酉尙書省奏南客車俊等因權場貿易誤犯邊界罪當死上曰本非故意可免罪發還毋令彼國知之恐復治其罪詔有司嚴禁州縣坊里爲民害者閏月壬子詔太子詹事曰東宮官屬尤當選用正人如行檢不修及不稱職者具以名聞辛酉太白晝見洛陽縣賊聚衆攻盧氏縣殺

縣令李庭才亡入于宋三月癸巳朔萬春節宋高麗夏遣使來賀
乙卯上謂宰臣曰會寧乃國家興王之地自海陵遷都永安女直
人寢忘舊風朕時嘗見女直風俗迄今不忘今之燕飲音樂皆習
漢風蓋以備禮也非朕心所好東宮不知女直風俗第以朕故猶
尙存之恐異時一變此風非長久之計甚欲一至會寧使子孫得
見舊俗庶幾習效之太子詹事劉仲誨請增東宮牧人及張設上
曰東宮諸司局入自有常數張設已具尙何增益太子生於富貴
易入於侈惟當導以清儉朕自卽位以來服御器物往往仍舊卿
以此意諭之四月己巳定出繼子所繼財產不及本家者以所繼
與本家財產通數均分制以有司言特授洺州孝子劉政太子掌
飲丞乙亥上御睿思殿命歌者歌女直詞顧謂皇太子及諸王曰
朕思先朝所行之事未嘗暫忘故時聽此詞亦欲令汝輩知之汝

輩自幼惟習漢人風俗不知女直純實之風至於文字語言或不
通曉是忘本也汝輩當體朕意至於子孫亦當遵朕教誡也辛巳
更定盜宗廟祭物法五月壬辰朔日有食之戊戌禁女直人毋得
譯爲漢姓壬寅真定尹孟浩薨甲辰尙書省奏鄧州民范三毆殺
人當死而親老無侍上曰在醜不爭謂之孝孝然後能養斯人以
一朝之忿忘其身而有事親之心乎可論如法其親官與養濟六
月樞密使完顏思敬薨七月庚子復以會寧府爲上京庚戌罷歲
課雉尾八月丁卯以判大興尹趙王永中爲樞密使詔賜諸明安
穆昆廉能三等官賞己卯御史大夫璋罷丙戌以左副都點檢襄
等爲賀宋生日使丁亥秋獵九月辛卯朔以宿直將軍和索哩原
胡什爲夏國生日使辛亥還都大名府僧李智究等謀反伏誅十
月乙丑歲星晝見丙子以前南京留守唐古安禮爲尙書右丞十

一月以大興尹璋爲賀宋正旦使引進使德敦爲高麗生日使上謂宰臣曰外路正五品職事多闕員何也太尉李石對曰資考少有及者上曰苟有賢能當不次用之王子吏部尙書梁肅請禁奴婢服羅綺上曰近已禁其服明金行之以漸可也且教化之行當自貴近始朕宮中服御常自節約舊服明金者已減大半矣近民間風俗比正隆時聞稍淳儉卿等當更務從儉素使民知所效也十四年正月己丑朔宋高麗夏遣使來賀二月壬戌以大興尹璋使宋有罪杖百五十除名仍以所受禮物入官丙寅以刑部尙書梁肅等爲宋詳問使庚午以太尉尙書令李石爲太保致仕戊寅詔免去年被水旱百姓租稅三月戊子朔萬春節宋高麗夏遣使來賀甲午上謂大臣曰海陵純尙吏事當時宰執止以案牘爲功卿等當思經濟之術不可狃于故常也又詔明安穆昆之民今後

不許殺生祈祭若遇節辰及祭天日許得飲會自二月一日至八月終並禁絕飲燕亦不許赴會他所恐妨農功雖閒月亦不許痛飲犯者抵罪可徧論之又命應衛士有不閑女直語者並勒習學仍自後不得漢語辛丑太白歲星晝見甲辰上更名雍詔中外丙辰太白歲星晝見經天四月乙丑上諭宰臣曰聞愚民祈福多建佛寺雖已條禁尙多犯者宜申約束無令徒費財用戊辰有事于太廟以皇太子攝行事乙亥以勸農副使完顏佛寧原作滿涅爲橫賜高麗使上御垂拱殿顧謂皇太子及親王曰人之行莫大於孝弟孝弟無不蒙天日之祐汝等宜盡孝于父母友于兄弟自古兄弟之際多因妻妾離間以至相違且妻者乃外屬耳可比兄弟之親乎若妻言是聽兄弟相違甚非理也汝等當以朕言常銘于心戊子以樞密副使圖克坦克寧兼大興尹五月丙戌朔詳問使梁肅

等還自宋甲午如金蓮川六月己未太白晝見八月丁巳次珠爾

蘇原作里舌日中白龍見御帳東小港中須臾乘雲雷而去癸亥獵于

瑪哩布原作離補己卯太白晝見九月丁亥還都乙未以兵部尚書

完顏讓等為賀宋生日使宿直將軍崇勳為夏國生日使癸卯上

退朝謂侍臣曰朕自在潛邸及踐阼以至于今於親屬舊知未嘗

欺心有徇近御史臺奏樞密使永中嘗致書河南統軍使完顏仲

託以賣馬朕知而不問朕之欺心此一事耳夙夜思之甚如有疾

己酉宋遣使報聘十月乙卯朔詔圖畫功臣二十人行慶宮聖武

殿之左右廡十一月甲申朔日有食之丙申御史中丞劉仲誨等

為賀宋正旦使戊戌召尚食局使諭之曰大官之食皆民脂膏日

者品味太多不可徧舉徒為虛費自今止進可口者數品而已戊

申以儀鸞局使曹士元為高麗國生日使十二月戊寅以平章政

事完顏守道爲右丞相樞密副使圖克坦克寧爲平章政事

十五年正月

此下闕

七月丙午展盤

原作粘

與其所部喀喇貝歡

原作康

里李古等內附九月戊子至白金蓮川辛卯高麗西京留守趙位

寵叛其君請以慈悲嶺以西鴨綠江以東四十餘城內附不納丙

申幸新宮閏月己酉朔定應禁弓箭鎗刀路分品官家奴客旅等

許帶弓箭制上謂左丞相良弼曰今之在官者須職位稱愜所望

然後始加勉力其或稍不如意則止以度日爲務是豈忠臣之道

耶丁巳又謂良弼曰武靈時領省秉德左丞相言皆有能名然爲

政不務遠圖止以苛刻爲事言及克實等在會寧時一月之間杖

而殺之者二十人罪皆不至於死於理可乎海陵爲人如虎此輩

尙欲以術數要之以至賣直取死得爲能乎己未以歸德尹完顏

王祥等爲賀宋生日使符寶郎錫默和尚爲夏國生日使辛酉高

麗國王奏告趙位寵伏誅詔慰答之詔親王百官僉人所服紅紫
改爲黑紫甲戌詔年老之人毋注縣今年老而任從政其佐亦擇
壯者參用十月乙未冬獵丁未還都十一月乙卯上幸東宮初唐
古部族節度使伊喇摩多原作移之子殺其妻而逃上命捕之至
是皇姑梁國公主請赦之上謂宰臣曰公主婦人不識典法罪尙
可恕摩多請託至此豈可貸宥不許戊午以右宣徽使靖等爲賀
宋正旦使甲子太白晝見戊辰以宿直將軍阿克占富勒呼爲高
麗生日使

十六年正月戊申朔宋高麗夏遣使來賀甲寅詔免去年被水旱
路分租稅甲子詔宗屬未附玉牒者並與編次丙寅上與親王宰
執從官從容論古今興廢事曰經籍之興其來久矣垂教後世無
不盡善今之學者旣能誦之必須行之然知而不能行者多矣苟

不能行誦之何益女直舊風最爲純直雖不知書然其祭天地敬親戚尊者老接賓客信朋友禮意款曲皆出自然其善與古書所載無異汝輩當習學之舊風不可忘也戊辰宮中火庚午上按鷹高橋見道側醉人墮驢而卧命左右扶而乘之送至其家辛未皇姑邀上至私第諸妃皆從宴飲甚歡公主每進酒上立飲之二月庚寅皇子瀋王妃圖克坦氏以姦伏誅己亥平章政事圖克坦克寧罷以女故三月丙午朔日有食之是日萬春節改用明日宋高麗夏遣使來賀戊申雨豆於臨潢戊午上御廣仁殿皇太子親王皆侍膳上從容訓之曰大凡資用當務節省如其有餘可周親戚勿妄費也因舉所御服曰此服已三年未嘗更換尙爾完好汝等宜識之王申復置烏都温部原作吾都圖哩原作禿里四月丙戌詔京府設學養士及定宗室宰相子程試等第戊子制商賈舟車不得用

馬以東京留守崇尹為樞密副使壬寅如金蓮川五月戊申南京

宮殿火甲寅太白晝見庚申遣使禱雨靜寧山神有頤而雨六月

山東兩路蝗七月壬子夏津縣令伊喇算卓原作移刺山住坐贓伏誅八

月辛巳次霹靂灤九月乙巳至自金蓮川己酉諭左丞相赫舍哩

良弼曰西邊自來不備儲蓄其令所在和糴以為緩急之備癸丑

以殿前都點檢富察通等為賀宋生日使宿直將軍完顏托果斯

原作戴古速為夏國生日使諭左丞相良弼曰海陵非理殺戮臣下甚

可哀憫其博勒準原作李論出等遺骸仰逐處訪求官為收葬辛酉以

南京宮殿火留守轉運兩司官皆抵罪十月丙申詔諭宰執曰諸

王小字未嘗以女直語命之今皆當更易卿等擇名以上十一月

壬寅朔參知政事王蔚罷尙書省奏河北東路和掄明安所轄穆

昆富珠哩色色原作李木魯舍斯以穆昆讓其兄子富色里原作滿速列上賢

而從之仍令議加色色恩賞戊午以同知宣徽院事劉琬等為賀

宋正旦使庚申以吏部尚書張汝弼為參知政事甲子以鈕祜祿

罕努之子尙和原作詳古為尙輦局直長羅索為武器直長初罕努被

旨招契丹達實後不知所終至是因展盤部長薩里罕托色原作撒里

雅寅特斯等來詢之乃知其死節之詳故錄其後遣兵部郎中伊喇子

元為高麗國生日使十二月壬申朔詔諸科人出身四十年方注

縣今年歲太遠今後仕及三十二年別無負犯贓染追奪便與縣

令丙子詔諸流移人老病者官與養濟上諭宰臣曰凡已經奏斷

事有未當卿等勿謂已行不為奏聞改正朕以萬幾之繁豈無一

失卿等但言之朕當更改必無吝也庚寅定權場香茶罪賞法

十七年正月壬寅朔宋高麗夏遣使來賀高麗并表謝不納趙位

寵丙午有司奏高麗所進玉帶乃石似玉者上曰小國無能辨識

者誤以爲玉耳且人不易物惟德其物若復却之豈禮體耶戊申
詔於衍慶宮聖武殿西建世祖神御殿東建太宗睿宗神御殿詔
西北路招討司契丹民戶其嘗叛亂者已行措置其不與叛亂及
放良奴隸可徙烏庫哩實壘部令及春耕作尙書省奏烏都温部
齊特庫爾阿勒瑪斯原作體上胡魯雅里密斯請入獻許之庚戌詔諸大臣家
應請功臣號者既不許其子孫自陳吏部考功郎其詳考其勞績
當賜號者卽以聞壬子上謂宰臣曰宗室中年高者往往未有官
稱其先皆有功於國朕欲稍加以官使有名位可稱如何對曰親
親報功先王之令則丁巳詔朝官嫁娶給假三日不須申告壬戌
詔宰臣海陵時大臣無辜被戮家屬籍沒者並釋爲良遼豫王宋
天水郡王被害子孫各葬於廣寧河南舊塋其後復詔天水郡王
親屬於都北安葬外咸平所寄骨殖官爲葬於本處遼豫王親屬

永入本塋者亦遷祔之三月辛丑朔宋高麗夏遣使來賀辛亥詔免河北山東陝西河東西京遼東等十路去年被旱蝗租稅振東京博索哈斯罕三路乙丑尙書省奏三路之粟不能周給上曰朕嘗語卿等遇豐年卽廣糴以備凶歉卿等皆言天下倉廩盈溢今欲振濟乃云不給自古帝王皆以蓄積爲國家長計朕之積粟豈欲獨用之耶今旣不給可於鄰道取之以濟自今預備當以爲常四月甲戌制世襲明安穆昆若出仕者雖年未及六十欲令子孫襲者聽戊寅諭宰臣曰郡縣之官雖以罪解一二歲後亦須再用明安穆昆皆太祖創業之際於國勤勞有功之人其世襲官不宜以小罪奪免戊子以滕王府長史圖克坦烏哲爲橫賜高麗使五月尙書省奏定皇家袒免以上親燕饗班次並從唐制癸卯幸姚村浣閱七品以下官及宗室子諸局承應人射柳賞有差六月已

卯謂宰臣曰朕年老矣恐因一時喜怒處置有所不當卿等卽當執奏毋爲面從成朕之失乙未以英王爽之子色埒此與本卷前色埒非一人

爲忠順軍節度副使爽入謝上曰朕以卿疾故特任卿子所冀卿

因喜而愈也欲卽加峻授恐色埒年幼未閑政事汝當訓之使有

善可觀更當升擢七月壬子尙書省奏歲以羊三萬賜西北路戍

兵上問如何運致宰臣不能對上曰朕雖退朝留心政務不遑安

寧卿等勿謂細事非帝王所宜問以卿等於國家之事未嘗用心

故問之耳是月大雨河決八月己巳觀稼于近郊壬申以監察御

史體察東北路官吏輒受訟牒爲不稱職笞之五十庚辰上謂宰

臣曰今之在官者同僚所見事雖當理亦以爲非意謂從之則恐

人謂政非己出如此者多朕甚惡之今觀大理寺所斷雖制有正

條理不能行者別具情見朕惟取其所長夫爲人之理他人之善

者從之則可謂善矣壬午上謂宰臣曰今在下僚豈無人材但在上者不爲汲引惡其材勝己故耳丙戌上謂御史中丞赫舍哩邈曰臺臣糾察吏治之能否務去其擾民且冀其得賢也今所至輒受訟牒聽其妄告使爲政者如何則可九月丁酉朔日有食之辛丑封子承德爲薛王以右副都點檢完顏實訥埒等爲賀宋生日使癸卯以兵部郎中舒穆魯呼圖爲夏國生日使戊申秋獵庚戌歲星熒惑太白聚於尾甲子還都十月己巳夏國進百頭帳詔却之境上癸酉有司奏衍慶宮所畫功臣二十人惟五人有諡今考檢餘十五人功狀擬定諡號以進詔可詔以羊十萬付烏庫哩實壘部畜牧其滋息以予貧民丁丑制諸明安父任別職子須年二十五以上方許承襲辛巳上謂宰臣曰今在位不聞薦賢何也昔狄仁傑起自下僚力扶唐祚使旣危而安延數百年之永仁傑雖

賢非婁師德何以自薦乎癸未更護送罪人逃亡制上謂宰臣曰
近觀上封章者殊無大利害且古之諫者既忠於國亦以求名今
之諫者爲利而已如戶部尙書曹望之濟南尹梁肅皆上書言事
蓋覬覦執政耳其於國政竟何所補達官如此况餘人乎昔海陵
南伐太醫使祁宰極諫至戮於市此本朝以來一人而已丁亥上
命宰臣曰監察御史田忠孺嘗上書言事當升擢以勵其餘十一
月戊戌以南京留守圖克坦克寧爲平章政事庚戌上謂宰臣曰
朕常恐重斂以困吾民自今諸路差科之煩細者亦具以聞有司
奏夏國進御帳使因邊臣懇求進入乃許之以尙書左丞石琚爲
平章政事丙辰以延安尹完顏富拉塔原作蒲刺睹等爲賀宋正旦使
十二月戊辰以渤海舊俗男女婚娶多不以禮必先攘竊以奔詔
禁絕之犯者以姦論以宿直將軍布薩懷忠爲高麗生日使己巳

太白晝見壬申以尙書右丞唐古安禮爲左丞殿前都點檢富察
通爲右丞上謂宰執曰朕今年已五十有五若年踰六十雖欲有
爲而莫之能矣宜及朕之康強其女直人明安穆昆及國家政事
之未完與夫法令之未一者宜皆修舉之凡所施行朕不爲怠
十八年正月丙申朔宋高麗夏遣使來賀壬寅定殺異居周親奴
婢同居卑幼輒殺奴婢及妻無罪而輒毆殺者罪庚戌修起居注
伊喇傑上書言每屏人議事雖史官亦不與聞無由紀錄上以問
平章政事石琚左丞唐古安禮對曰古者天子置史官於左右言
動必書所以儆戒人君庶幾有所畏也庚申免中都河北河東山
東河南陝西等路前年被災租稅壬戌如春水二月丙寅朔次管
莊丙子次華港己丑還宮三月乙未朔萬春節宋高麗夏遣使來
賀乙巳命戍邊女直人遇祭祀婚嫁節辰許自造酒丁未上謂宰

執曰縣令之職最爲親民當得賢材用之邇來犯法者眾殊不聞有能者比在春水見石城玉田兩縣令皆年老苟祿而已畿甸尙爾遠縣可知平章政事石琚對曰良鄉令焦旭慶都令李伯達皆能吏可任上曰審如卿言可擢用之己酉禁民間無得勅興寺觀獻州人殷小二等謀反伏誅四月己巳上謂宰臣曰朕巡幸所至必令體訪官吏臧否向玉田知主簿舒穆魯沓能吏也可授本縣令己丑以太子左贊善阿布哈原作阿不罕德甫爲橫賜高麗使五月丙午上如金蓮川六月庚午尙書左丞相赫舍哩良弼薨閏月辛丑命振西南西北兩招討司民及烏庫哩實壘部轉戶饑七月丙子上謂宰臣曰職官始犯臧罪容有錯誤至於再犯是無改過之心自今再犯不以臧數多寡並除名八月乙巳至自金蓮川丙辰以尙書右丞相完顏守道爲左丞相平章政事石琚爲右丞相九

月辛未以大理卿張元鼎等為賀宋生日使侍御史完顏富勒呼

此與木卷前富勒呼非一人為夏國生日使癸酉以尙書左丞唐古安禮為平

章政事乙亥以右丞富察通為左丞參知政事伊喇道為右丞刑

部尙書鈕祜祿噶達爾為參知政事十月庚寅朔陝州防禦使舒

穆嚙錦嘉努原作石抹以罪除名甲午御史中丞劉仲誨侍御史

李瑜坐失糾察大長公主爭削一階十一月庚申朔尙書省奏擬

同知永寧軍節度使事額爾克原作阿可為刺史上曰額爾克年幼未

練事授佐貳官可也平章政事唐古安禮曰臣等以額爾克宗室

故擬是職上曰郡守係千里休戚安可不擇人而私其親耶若以

親親恩賜與雖厚無害於政使之治郡而非其才一境何賴焉壬

申以靜難軍節度使烏雅扎拉等為賀宋正旦使丙子尙書省奏

崇信縣令石安節買車材於部民三日不償其直當削官一階解

職上因言凡在官者但當取其貪污與清白之尤者數人黜陟之
則人自知懲勸矣夫朝廷之政太寬則人不知懼太猛則小玷亦
將不免於罪惟當用中典耳庚寅上責宰臣曰近問趙承元何故
再任卿等言曹王嘗遣人言其才能幹敏故再任之官爵擬注雖
由卿輩予奪之權當出于朕曹王之言尚從之假皇太子有所諭
則其從可知矣此事因卿言始知其不知者知復幾何且卿等公
受請屬可乎蓋承元前爲曹王府文學與王邸婢姦杖百五十除
名而復用也丙戌以吏部尚書烏庫哩元忠爲御史大夫以東上
閣門使左光慶爲高麗生日使十二月庚戌封孫烏達布原作吾
都補

溫國公瑪達格

原作麻
達葛

金源郡王承慶道國公王子羣臣奉上大

金受命萬世之寶

十九年正月庚申朔宋高麗夏遣使來賀丁卯如春水二月己酉

還宮乙卯免去年被水旱民田租稅三月己未朔萬春節宋高麗
夏遣使來賀乙丑尙書省奏虧課院務宮顏葵等六十八人各合
削官一階上曰以承廢人主權沾此違法也法弊則當更張唐宋
法有可行者則行之己巳上與宰臣論史事且曰朕觀前史多溢
美大抵史書載事貴實不必浮辭詔諛也辛未上謂宰臣曰姦邪
之臣欲有規求往往私其黨與不可明言託以他事陽不與而陰
爲之力朕觀古之姦人當國家建儲之時恐其聰明不利於己往
往風以陰事破壞其議惟擇昏懦者立之冀他日可弄權爲功利
也如晉武欲立其弟而姦臣沮之竟立惠帝以致喪亂此明驗也
丁丑上謂宰臣曰朕觀前代人臣將諫於朝與父母妻子訣示以
必死同列目覩其死亦不顧身又爲之諫此盡忠於國者人所難
能也己卯制糾彈之官知有犯法而不舉者減犯人罪一等科之

關親者許回避上謂宰臣曰人多奉釋老意欲徼福朕蚤年亦頗
惑之旋悟其非且上天立君使之治民若盤樂怠忽欲以僥倖祈
福難矣果能愛養下民上當天心福必報之四月己丑朔詔振西
南路招討司所部民己酉以升祔閔宗詔中外丁巳歲星晝見五
月戊寅幸太寧宮六月戊子朔詔更定制條七月辛未有司奏擬
趙王子實古納原作石古乃人從上不從謂宰相曰兒輩尙幼若奉承
太過使侈心滋大卒難節抑此不可長諸兒每入侍當其語笑娛
樂之際朕必淵默涖之以嚴庶其知朕教戒之意使常畏懼而寡
過也癸酉密州民許通等謀反伏誅丙子太白晝見庚辰至自太
寧宮八月壬辰尙書右丞相石琚致仕戊戌以宋大觀錢當五用
丙午濟南民劉溪忠謀反伏誅九月戊午以左宣徽使富察鼎壽
等爲賀宋生日使太子左衛率府率費摩呼喇原作裴滿胡刺爲夏國生

日使癸亥秋獵癸未還都十月辛卯西南路招討使扎克丹

原作哲典

以賊伏誅辛亥制知情服內成親者雖自首仍依律坐之十一月
壬戌改葬昭德皇后大赦以御史中丞伊喇慥等爲賀宋正旦使
戊辰以西上閣門使盧拱爲高麗生日使壬申上如河間冬獵癸
未至自河間

二十年正月甲寅朔宋高麗夏遣使來賀戊午定試令史格壬戌
命歲以錢五千貫造隨朝百官節酒及冰燭藥炭視品秩給之己
巳如春水丙子幸石城縣行宮丁丑以玉田縣行宮之地偏林爲
御林大淀灤爲長春淀二月丁未還都三月癸丑朔萬春節宋高
麗夏遣使來賀己未詔有犯罪被問官雖遇赦不得復職乙丑以
新定明安穆昆詔免中都西京河北山東河東陝西路去年租稅
辛巳以平章政事圖克坦克寧爲尙書右丞相御史大夫烏庫哩

元忠爲平章政事四月丁亥定冒廢罪賞己亥制宗室及外戚并
一品命婦衣服聽用明金以西上閣門使郭喜國爲橫賜高麗使
太寧宮火乙巳上謂宰臣曰女直官多謂朕食用太儉朕謂不然
夫一食多費豈爲美事况朕年高不欲屠宰物命貴爲天子能自
節約亦不惡也朕服御或舊常使澣濯至于破碎方始更易向時
帳幕常用塗金爲飾今則不爾但令足用何必事紛華也庚戌如
金蓮川五月丙寅京師地震生黑白毛七月旱八月壬午秋獵九
月壬戌至白金蓮川以太府監李佺等爲賀宋生日使少府少監
薩布原作蒲爲夏國生日使丙子布沙堪原作蒲羣牧羅和原作老忽謀
叛伏誅十月庚辰朔更定銓注縣令丞簿格詔西北路招討司每
進馬馳鷹鶻等輒率斂部內自今並罷之壬午上謂宰臣曰察問
細微非人君之體朕亦知之然以卿等殊不用心故時或察問如

山後之地皆爲親王公主權勢之家所占轉租於民皆由卿等之

不察卿等當盡心勤事毋令朕之煩勞也詔徙約羅

原作遙落

河伊瑪

原作移馬

河兩明安於大名東平等路安置戊戌上謂宰臣曰凡人在

下位欲冀升進勉爲公廉賢不肖何以知之及其通顯觀其施爲
方見本心如招討扎克丹初任定州同知繼爲都司未嘗少有私
徇所至有清名及爲招討不固守人心險于山川誠難知也壬寅
上謂宰臣曰近覽資治通鑑編次累代廢興甚有鑒戒司馬光用
心如此古之良史無以加也校書郎毛磨朕屢問以事善應對真
該博老儒可除太常職事以備討論甲辰以殿前都點檢襄爲御
史大夫十一月丁巳尙書右丞伊喇道罷乙丑以真定尹圖克坦
守素等爲賀宋正旦使癸酉以御史大夫襄爲尙書右丞乙亥上
諭宰臣曰郡守選人資考雖未及廉能者則升用之以勵其餘以

太常少卿任侗爲高麗生日使十二月辛巳上謂宰臣曰岐國用人但一言合意便升用之一言之失便責罰之凡人言辭一得一失賢者不免自古用人咸試以事若止以奏對之間安能知人賢否朕之取人衆所與者用之不以獨見爲是也己亥河決衛州辛丑獵于近郊癸卯特授襲封衍聖公孔總兗州曲阜令封爵如故

金史卷七考證

世宗紀大定十五年正月此下闕 按是年自正月至七月原史

註闕字金世宗當極盛之時半年餘豈無一事可紀今自本紀外既無附見志傳之事而徧考大金國志及宋史資治通鑑松漠紀聞諸書亦無可引證金世宗實錄成於明昌四年惟時史院諸臣不應如此疎漏或元季修史偶有殘佚遂至失傳今既無可考據仍從闕疑